

Imanaventajeitaquero Ishanincapeeni Israel Quipatsi Canaán

JOSUÉ

Oca sanquenarentsi oquenquetsatacotiri Josué ipoyeetajariri Moiseshini. Ijivatacaajeitantanajariri ishanincapeeni imanatacoventajeitancarori quipatsi Canaán. Impoiji ipavacaajeitacaro aparopeeni quipatsi icashiacaqueriri Tasorentsi irisavicajeitanteari.

Ipoyeetajari Josué Moiseshini

1 ¹Icamantacari Moiseshini quemisantasanotiriri Tasorentsi, ari iquenquetsatacaqueri Tasorentsi Josué, itomini Nun, amitacotiriri Moiseshini; icantiri:

²“Camaque meeca Moiseshini quemisantanari. Meeca nocoacaquempi aviro jivatacaajeitanajerine pishanincapee, pimontecaajeitanajeri intatiqueronta nija Jordán. Avirotaque areetacaajeitearine quipatsiqui nocashiacaquempiri pisavicantajeiteari. ³⁻⁴Tempa nocantasanotitacari Moiseshini: ‘Nomperi pishanincajeitajeari maaroni quipatsi irareejeiteari oponeanaquea caaraiteriqui, jero otishiqui Líbano, irosati antearojaqui Éufrates jero maaroni iipatsitequi hititapee, irosati incajarequi Mediterráneo.’ ⁵Noncanteani quiso noyempi, eiro catsini nojoquimpitsi noquempetiri Moiseshini. Ariorica irimanayeevetempi, eiro imayeetimpitsi iranaacoyeetempi. ⁶Eiro pitsaroitsi, irointi pishintsishiretanaque, pimatantearori pimpajeiteri pishanincapee quipatsi nocashiacaqueriri irisavicajeitanteari. Tempa nocashiacaasanotaqueri intacantajeitaquempiniri. ⁷Irotaque nocoacaasanotantaquempiri, eiro pitsaroitsi, irointi pishintsishiretasanotanaque. Pimoncaratasanotero maaroni nocantacantiri yoametanaquempiri Moiseshini. Eiro pipeacotarotsi ocantayetiri, pimatantearori paitapeerica pantayeteri.

⁸Pincanteani pampiitapinitero pineanatapinitero nocantacantiri sanquenatacotainchari. Pinquenqueshiretapinitero quitaiteripeequi aisati tsiteniripeequi, pimatantearori ocantayetiri. Ariorica pimajeitaquero oca, cameetsa pintimajeitanaque. ⁹Narotaque cantaquempiri: eiro pitsaroitsi; pishintsishiretanaque aisati eiro picantashiretitsi. Tempa narotaque Tasorentsisanori Pitasorentsite. Noncanteani quiso noyempi jaocapeerica pijayeteri.”

Yora ishanincajeitaniri Israel yovetsicajeitaca irimanajeitanteari

¹⁰Irosati icantantacari Josué jivatacaayetiriri ishanincapee: ¹¹“Meeca pijajeite pisavicayetinta, pincantajeiteri ashanincapee irovetsicajeiteta oanarontsipee; tempa omavatapaaquerica quitaiteri amonteajeitero nija Jordán, aajeitantearori quipatsi impashijeiteeri Atasorentsite.”

¹²Aisati iquenquetsatacairi iriori jivatacaajeitiriri ishanincasanoripeeni Rubén, Gad jeri Manasés, savicaarantaintsiri intatiquero nija Jordán. Icantiri:

¹³—Pinquenqueshirejeitajero icantasanotaqueri Moiseshini, quemisantisanotiriri Tasorentsi. Tempa icantajeitaquempi: ‘Oca quipatsi irotaque ipaquempiri Tasorentsi, pisavicanajeiteari avirori, pimacoreajeitanteari.’ ¹⁴Meeca nocoacajeitaquempi, maaroni manajeitachaneri, pijivajeitanaqueri ashanincapee, pamitacojeitena amanatacoventajeitero quipatsi. Irontiquea pijinapee, pitomipee jeri pivirapee poisavicajeitanaquerotsita aca piipatsitequi acaqueroquica nija Jordán ipanaquempiri Moiseshini. ¹⁵Ariorica omoncarataquea impajeitaqueri iriori Tasorentsi quipatsi irisavicajeitanaquerica cameetsa, iquempetaquempi avirori ipajeitaquempi; impoijiquea pimpiajeitajero aca piipatsitequi ipajeitanaquempiri Moiseshini, quemisantiriri Tasorentsi, pisavicasanojeitantapempari.

¹⁶Ari onimojeitaqueri, icantajeiti:

—Jee aitaque nomajeitaquero picantajeitaquenari aisati jaocarica pincoacayenari, nojayete. ¹⁷Noncanteani nonquemisantajeitempi, noquempetiri Moiseshini noquemisantirini iriori. Irontiquea nocoacaasanotaquempi, quiso iroyempi Tasorentsi piquemisantiri, iquempetiri Moiseshini. ¹⁸Maaroni piatsatempineri, caari quemisanterone pincantaveteari, ocameetsati incame. Queario nocoacaasanotaquempi, eiro pitsaroitsi, irointi pishintsishiretanaque.

Itiancaque Josué amenanonterone nampitsi Jericó

2 ¹Ainiroquera isavicajeitapaaque Sitimiqui, itiancaque Josué apite amenanonterone nampitsi; icantiri: “Nocoi pijate pamenanontaitero quipatsi aisati nampitsi Jericó.”

Ari ijatanaque irosati yareetantacaro. Iqueapaaque ovancoqui tsinane antashiyetariri shiramparipee pajitachari Rahab; irotaque

imaimotapaaquero. ²Ari otsitenijencaiteanaji irosati icamanteetantacari pincatsaritatsiri, icantaquero:

—Areetapaaca ishanincapeeni Israel ovancoquinta Rahab. Irioyeata amenanonterone anampica.

³Iquemantacari, irosati itiancantaca amenerine ovancoqui. Icantapaaquero:

—Poimisotoajeitenarita areetapaaquempiri pivancoqui, irinti amenanonteeru.

⁴Iro cantaincha aitaque omanataquero incaaranqui, ocantiri:

—Jee, queariotaque aitaque ipocapanaintiri aca; iro cantaincha te notavaqueriji jaocarica iponeari. ⁵Jajeitanaji incaaranqui otsitenijencaiteantanajari, tequeratsita irashiyeetajero ashitacoronsi. Te nioteji jaocarica iquenanaajiri. Picoirica poijajeitanaquero intsipaite, naamaaca ari pineavajeri nianqui.

⁶Iro cantaincha ainiro omanaquero ovancoqui jenoqui, opiotironta lino isopatiyetiri oroantanaqueari.

⁷Ari ijajeitanaque ishanincapee pincatsari yojanajeivetanacari. Iquenanaquero jatantachari nijaqui Jordán, irosati yareejeitancaro oquiripejatapai. Ijajeitantanacari, yashitasanojeetaquero ashitacoro nampitsi iqueantapinijeitari. ⁸Yora amenanontirori, tequeratsita irimayaji, ari ataitashitanaquero Rahab, ocantapairi:

⁹—Niotaque yora Tasorensi impajeitempiro oca quipatsi. Icantashireacaasanoaquena, notsaroacaasanojeitantaquempiri, aisati iquempejeitaca maaroni noshanincapee savicajeitatsiri aca.

¹⁰Tempa noquemacojeitaquempi jaoca picantacari piponeajeitantanajari Egiptoqui. Yora Tasorensi ipirijataquempiro incajare Qutioncari, pavisajeitancari. Aisati niojeitaque iriotaque matacaajeitaquempiri pitsoncajeitantanacariri poajeitanaquero amorropee jeri apitetatsiniri ivincatsarite pajitachaniri Sihón jeri Og, savicajeitatsiniri intatiquero nija Jordán. ¹¹Irotaque notsaroacaasanojeitantaquempiri, tecatsi materone irijatashjeitempi irimanayeetempi. Tempa yora Pivincatsarite Tasorensi piquemisantajeitiri, iriotaque pincatsariventajeitiriri inquiresati aisati quipatsisati. ¹²Irotaque nocantantimpiri meeca pincantasanojeitena ariorica pimajeitaquero pintacotena aisati noshanincapee, noquempejeitaquempi avirori nintacotavaquempi cameetsa. Tempa ineajeitaquero Tasorensi. Piotacaasanotena meeca ariorica pimancarataquenaro nocantajeitaquempiri. ¹³Nocoasanotaque poavisaacojeitena, eiro poanatsi aisati apa, ina, nojariripee, nirentopee jero maaroni timimoyetanari.

¹⁴Ari icantanaquero:

—Aitaque nomajeitaquero oca picantaquenari, eiro noajeitimpitsi. Iro cantaincha, eiroya picamantayetitsi oca nocantaquempiri. Aitaque

noncavintsaajeitaquempi ariorica impajeitaquenaro Tasorentsi oca quipatsi.

¹⁵Ora Rahab timatsi ovanco jenoqui otantotacoroqui nampitsi. Irosati aantacaro soocatsa oaniireacojeitajiri omoroqui amenacotantayetari, isotoantanajari amenanontirori. ¹⁶Ari ocantiri:

—Pijataje pinquenana je toncaariquinta, eiroquea ineajeitantavajimpitsi coajeitimpiri. Pimanavaqueatsita anta oncarate mava quitaiteri impiajeitavajetsita aca. Impoijiquea pinquenajeitanajero piquenapaaquenta.

¹⁷Ari icantanaquero iriori:

—Jee, aitaque aisati narori nomoncarajeitaquempiro picantasanotaquenari. ¹⁸Iro cantaincha noncantempi: Ariorica pineavaquena nompocajeitaque, ocameetsati pintsatero omoroqui oca soocatsa quitioncatsari poaniireantajanari. Aisati pampatojeiteri pivancoqui piri, piniro, pijariripee jeri ishanincasanoripee piri.

¹⁹Jaanicarica sotoanaintsine pivancoqui, irisati oacantajanchane. Te naro cantacaashijeitearone. Irompa iriorica noshanincepee oaarantapaaquerine pivancoquiniri, naro cantacaajeitearone. ²⁰Aisati ariorica pincamantacoyetaquena, eiro nomajeitirotsi nomoncaratempiro oca nocantasanovetaquempiri.

²¹Ari ocantanaquero:

—Jee, aitaque oncanteari.

Ari ovetsatavajari, irosati ijatantanaja. Impoiji otsataquero iroori soocatsa quitioncatsari omoroqui. ²²Iquenajeitanaquero anta toncaariqui, imanajeitaca ocarataque mava quitaiteri ainiroquera iriori manayetachari icoacoayevetari. Iro cantaincha te irineavajeriji, irosati ipiajeitantaja inampiqui. ²³Impoiji yoirincajeitanaja iriori amenanontantatsiri, imonteanajaro nija Jordán irosati yareetantaja isavicajeitapaaquenta ishanincepee. Ari icamantayetapaaquero Josué maaroni ineyetaitiri aisati avishimoyevetacariri. ²⁴Icantiri: “Queario ipaqueero Tasorentsi maaroni quipatsi. Aisati yora savicajeitatsiri nampitsipeequi, oshequi itsaroacaasanojeitaquene catsini.”

Yareejeitancarori ishanincajeitaniri Israel nijaqui Jordán

3 ¹Ari oquitaiteamanaque capichaji quitaite, yora Josué aisati maaroni ishanincepee iponeanaja Sitimiqui irosati yareetimojeitancaroro nijaqui Jordán. Aitaque isavicajeitapaaquero tequeratsita irimonteajeitearo. ²Ari avisanaque mava quitaiteri, irosati ijatantaca jivatacantayetatsiri isavicajeitapaaquenta ishanincepee. ³Icantajeitiri: “Ariorica pineajeitavaquero antaveeyetatsiri iravisacaanaquero Cajón onantari Icantacantiri Tasorentsi, pijajeiteyea avirori poijajeitanaquero. ⁴Irotaque piojeitancarori jaoca anquenajeitanaquero, tempa acarajeitica

tecatsi ioterone avotsi. Eiroyeya piquempejijeitarotsi Cajón, ainti pintimajeitapee nijanta oncarate aparo kilometro.”

⁵Yora Josué icantiri maaroni ishaninceapee: “Poameetsajeitempa irineacameetsajeitantempiri Tasorentsi; tempa osaitequera ironijayeero caari aneapinjieiti.” ⁶Aisati icantiri iriori antaveeyetatsiri: “Aviroyeya jivajeitanaintsine amonteajeitantanaqueari, paanaquero Cajón onantari Icantacantiri Tasorentsi.”

Irosati yaajeitantacaro, yavisajeitanaqueri ishaninceapee irijivatantanaqueari. ⁷Ari icantajiri Tasorentsi Josué: “Meeca nomatacaasanotempiro cameetsatsiri, iriojeitantanaqueari pishaninceapee quiso noaquempi, noquempetiri Moiseshini. ⁸Meeca aviro canterine antaveeyetatsiri, jivatacaanaquerone Cajón onantari Nocantacantiri, ariorica irareetapaquearo otsapijaqui Jordán, aitaque incatijatacaapeerori.”

⁹Impoiji icantiri Josué ishaninceapee: “Pimpocajeitanaque aca, pinquemisantero icantaquenari Pivincatsarite Tasorentsi. ¹⁰Irotaque ayojeitanteari icarajeitaquee Tasorentsisanori Aneasanotatsiri: ariorica avaajeitanaquea, iriotaque jivatanaqueene, intsoncajeiteri canaaneopee, hititapee, heveopee, ferezeopee, gergeseopee, amorreopee jeri jebuseopee. ¹¹Pamene, ora Cajón otimantari Icantacantiri Tasorentsi yora pincatsariventirori maaroni quipatsi, ojivatanaquempi omonteacotantanaquea. ¹²Meeca pincoyeayete pishaninceapee incarate 12 shirampari, aparopeeni ashanincasanoripee acarajeitica 12. ¹³Yora antaveeyetatsiri aanaquerone Cajón otimantari Icantacantiri Tasorentsi pincatsariventirori maaroni quipatsi, ariorica iraticajatapaaquero nija ontencareajatanaque nianqui. Irosati onticaajatantanaquea pocaajatatsiri catonco, eiro oshiaajatanajatsi antearo ovoncaatanaquea.”

Imonteajeitantanacarori nija Jordán

¹⁴⁻¹⁵Yora ishanincajeitaniri Israel yojocanajiro isavicajeitapaaquenta, ijajeitanaque irimonteajeitantanaquearori nija Jordán. Irio antaveeyetatsiri jivatacaanaquerori Cajón onantari Icantacantiri Tasorentsi, icatijatacaapaacaro otsapijaqui. (Ineapaaquero nija Jordán oquimojatasanoti, ainiroquera omoncarata yaviitanteetarori panquirentsipee.) ¹⁶Ari yaaticajatantapaacarori antaveeyetatsiri, irosati oticaajatantanaca catonco otiminta nampitsi Adam, tsipanampitarori nampitsi tantotacotachari Saretán. Aitaque opiojatapaacari, te oshiaajatanaje. Aisati oshiaajatanaca iroori quirincaniri, aatejatanarori incajare Catiojari. Aitaque ocantari opirijatantanacari irosati imonteajeitantanca ishanincajeitaniri Israel. Imontetapaacaro nampitsi Jericó. ¹⁷Irintiquea antaveeyetatsiri, quijacotirori Cajón, irosatiquera icatijaitea nianqui opirijaiteanaquenta Jordán, irosati itsoncajeitantaca yavisajeitanaque ishaninceapee intatiquero.

Ipiojeitaquero 12 mapipee

4 ¹Ari itsoncajeitancari yavisajeitanaque intatiqueroqui, irosati icantancari Tasorensi Josué: ²⁻³“Pincoyee pishanincepee incarate 12, aparopee jivataciriri ishanincasanoripee. Pincanteri irayetaitea 12 mapipee anta nianqui icatiajeitapaacanta antaveyetatsiri, irajeitanaquerota impiotapeero pimaajeitapenta.”

⁴⁻⁵Ari icajemaquero Josué caratatsiri 12, icantiri: “Pijajeite icatiacaapaacanta antaveyetatsiri quijacotaquerori Cajón otimantari Icantantiri Atasorensite, paayetaite aparopee mapi ampatoantanaqueari oncarate 12. ⁶Irotaque pitacaajeitantariri pitomipee coajicani, ariorica irisampijeitempi: ‘¿Paitampa opiotantari mapica?’ ⁷Ari pincamantajeiteri: ‘Iro opiotantari noquenqueshireantarori peerani nomonteajeitantapaacarori nija Jordán, ojvajeitaquena Cajón onantari Icantantiri Tasorensi, oticaajatanaca nianqui opirijatanaque.’ ”

⁸Ari imajeitaquero icantaqueriri Josué. Yayetaque aparopee mapi carajeitatsiri 12 ishanincasanoripeeni Israel, irajeitanaquero impiotapeero irisavicaajeitapenta. Imoncarajeitaquero icantaqueriri Tasorensi Josué.

⁹Aisati ipiotaque Josué nianqui nija Jordán ocarataque 12 mapipee, icatiajeitapaacanta antaveetatsiri. Irosati ocanta meeca otimi.

¹⁰Yora antaveetatsiri irosatiquera icatiajeita nianqui, yoyeajeitiri ishanincepee yantayetiro icantaqueriri Tasorensi Josué, ora icantaqueriri Moisheshini. Yora ishanincepee intsipaite yavisajeitanaque. ¹¹Ari isavicajeitapaaque intatiqueroqui. Impoiji ipocaji iriori antaveyetatsiri quijacotirori Cajón otimantari Icantantiri Tasorensi. Irosati yavisajeitantanajari maaroni ishanincepee, irijivajeitantanajeariri.

¹²Aisati yavisajeitaque iriori ishanincepeeni Rubén, Gad jeri Manasés savicaarantatsineri antaqueruquinta. Iriojeitaque jivajeitanaqueriri ishanincepee iramitacotantariri irimanajeitea. Imoncarajeitaquero icantanaqueriri Moisheshini. ¹³Icarajeitaque 40,000 shiramparipee vetsicajeitanainchari irimanajeitea. Quiso yoajeitaquero Tasorensi, yoveshintsaaajeitanaca ijajeitanaque irosati opampaiteapai Jericó.

¹⁴Aitaque intancari imatacaasanotaquero Tasorensi Josué, impincatsajeitantariri maaroni ishanincepee, iquempetiri Moisheshini ainiro itimini.

¹⁵Ari icantajiri Tasorensi Josué: ¹⁶“Pincantajeri meeca antaveyetatsiri amacotirori Cajón otimantari Nocantantiri, impocapitsatajerota nija Jordán.”

¹⁷Irosati icantantajari: “Pimpocajeitaje.” ¹⁸Isoquijantanajari nijaqui Jordán, yareetantajari otsapijaqui, intsipaite oshiaajatanaja antearoja catsini, aisatitapaaji oquempetani oquimojatasanoti.

¹⁹Yora ishanincajeitaniri Israel iponeantanajarori nijaqui Jordán iro 10 quitaiteri aparoquera cashiri intanajarori. Yovajeitanaca irosati isavicajeitantapaaca ipajitaquero Guilgal, imontetacotapaacaro Jericó acaqueroquinta iquenapai catsirincaiteri. ²⁰Aitaque yoveviricapaaquerori Josué mapipee caratatsiri 12 yaajeitanaquero nijaqui Jordán. ²¹Ari icantiri ishanincapee: “Ariorica coajicani irisampijeitempi pitomipee. ‘¿Paitampa opiotantari mapipeeca?’” ²²⁻²³Ari pincamantajeiteri jaoca icantaquerori Pivincatsarite Tasorentsi ora nija Jordán yovirijantacarori amonteajeitancari. Iquempetaquero peerani yovirijantaquero incajare Quitoncari, avisajeitancarori. ²⁴Irotaque iriotacojeitantajeariri maaroni atiripee savicajeitatsiri Itasorentsitanotaque catsini Tasorentsi. Aisati avirori, pincantaitiyempani pimpincatsatasanojeiteri Tasorentsisanori Pitasorentsite.”

Isavicantajeitapaacari ishaninajeitaniri Israel nampitsiqui Guilgal

5 ¹Maaroni pincatsariyetsiri amorreopeequi, savicajeitatsiri acaqueroquinta nija Jordán iqueapinitinta catsirincaiteri jeri iriori pincatsariyetsiri canaaneopeequi, saviquimojeitirori quempeji incajare Mediterráneo, iquemajeitaque yovirijantaquero Tasorentsi ora nija Jordán, imonteajeitantaacarori ishanincajeitaniri Israel. Ari itsaroacaasanojeitacari catsini, irotaque caari ijatashijeitanti irimanajeitavaquero. ²Impoiji icantiri Tasorentsi Josué: “Povetsique mapi cotsiropee, pintoyeantacantajeiteri meeca maaroni pishanincapee.”

³Ari yovetsicaque Josué cotsiropee itoyeantacantajeitancariri shiramparippee toncaariqui Aralot, isavicajeitapaaquenta. ⁴Aitaque itoyeantajeitanajari caari toyeantajeitachane. Tempa yora maaroni shiramparippee moncarajeitaquero 20 irosarentsipee poneajeivetajanchari Egiptoqui, camajeitaque nianqui caaraiteriqui. ⁵Maaroni soquijajeitajantsiri Egiptoqui itoyeantajeita. Irintiquea timayetanajantsiri nianqui caaraiteriqui, te intoyeantajeiteaji. ⁶Tempa ocarataque 40 osarentsi yaniijeitaqueni. Irotaque icamajeitancari maaroni shiramparippee manajeitachaniri poneajeivetajanchari Egiptoqui. Te inquemisantajeiterini Tasorentsi, irotaque icantasantacari: “Eiro parejeitarotsi quipatsi nocantasantaqueriri intacantajeitaquempiniri. Coajica nompajeiteri pishanincajeitajeari ora quipatsi oshiocasanoyetapai paitapeerica panquiveerentsiyetsiri, eiro ocoiteimojeitaritsi.” ⁷Irotaque itoyeantacantacari Josué itomipeeni ishaninca poyejeitajariri caari toyeantajeitachane, tempa irointita yaniijeitaqueni avotsiqui ipocajeitancari. ⁸Itsoncajeitancari itoyeantajeitaca, iquempoyeajeitaca ivancojaniquipeequi irosati itecatsijeitantanaja. ⁹Impoiji icantajiri Tasorentsi Josué: “Meeca pimataquero pitoyeantacantajeitaquero, nopeacotacaajeitajimpro yovashiventaajeivetaquempani egiptosati.” Irotaque ipajitasantacari Guilgal; irosati ocanta meeca opajita.

¹⁰ Ainiroquera isavicajeitapaaque inampiqui Guilgal, opampaiteapai Jericó, caratanaque 14 iitaiterite cashiri, ari ishaavijiiteanaji catsirincaiteri, iquimoshireventaquero Yavisantaniri. ¹¹ Ari yoajeitacaro tanta caari tapiacha jero tirico tashiiquiyetachari. Impoiji oquitaiteamanaque irosati yoajeitancaro panquirentsi shiocayetapaatsiri quipatsiqui Canaán. ¹² Irosati te irineajeroji maná iroajeitajearo, irointi intajeitacaro yoajeitapaacaro panquiveerentsiyetatsiri timapaatsiri quipatsiqui Canaán.

Ineaquero Josué Inampire Tasorentsi

¹³ Ari aparo quitaiteri ijataque Josué oquempjitapaaque nampitsi Jericó, irosati ineantacari aparo Shirampari yajiriqui isavirite. Ari ijatashitaquero quempeji, isampitapaaquero:

—¿Avirompa noshaninca? ¿Carimpimpa? ¿Avirompa quisajeitanari?

¹⁴ Ari yacanaquero, icantiri:

—Caarina pishaninca aisati caarina quisajeitimpiri. Narotaque jivatacaajeitiriri inampirepee Tasorentsi.

Iquemantacari, irosati itiyeroashitancari, yoivotanaca quipatsiqui ipincatsataquero. Icantaquero:

—Novincatsarite, ¿paitampa pincantenari?

¹⁵ Ari icantanaquero:

—Pisapatorempa; tempa oca quipatsi irotaque inashitacaari Tasorentsi. Ari iquemisantaquero, isapatoreanaca.

Icamantiri irimantantearori Jericó

6 ¹ Yora savicajeitatsiri nampitsipeequi oshequi itsarocaaasanojeitacari ishanincajeitaniri Israel. Irotaque yashitasantantearori ashitacorontsi, tecatsi queajeitatsine aisati tecatsi soquijajeitatsine.

² Ari icantiri Tasorentsi Josué: “Noshinetaquemperi savicajeitatsiri nampitsiqui Jericó, pintsoncajeiteri atiripee aisati ivincatsarite jeri manajeivetachari carajeitiriri. ³ Meeca nocoacaquempi aisati maaroni pishanincapee manajeitachaneri, pishoncajeitearo nampitsi aparopeeni quitaiteri, irosati omoncaratantapempa 6 quitaiteri.

⁴ Aisati incarataque 7 antaveeyetatsiri irayetanaque aparopee tiorentsi yovetsiqueetiri itseequi shirampari ovisha, irijivajeitanaquero anatacojeitanaqueroneri Cajón onantari Nocantacantiri. Iro caratapaatsineri 7 quitaiteri irosati pishoncapinijeitantaquearo nampitsi. Oncarate 7 aisati iriori antaveeyetatsiri intiojeitanaque.

⁵ Ariorica pinquemajeitaquero tiorentsipee intiotasanojeitanaquero catsini, irosati pincajemasanojeitanaquea avirori. Ontireantayetanaqueari otantotacoro nampitsi, omparianaque isaaviqui. Irosati pinqueajeitanaquea pimanajeitanteariri savicajeitatsiri.”

⁶Ari yapatotaquero Josué antaveeyetatsiri, icantiri: “Avirojei aanaquerone Cajón onantari Icantacantiri Tasorentsi. Aisati icantiri caratatsiri 7: ‘Avirojei jivanaquerone Cajón, paayetanaque tiorentsi.’”

⁷Impoiji icantiri maaroni ishanincepee: “Pijajeite pishoncajeitearo nampitsi. Irioquea manajeitachaneri, irio jivajeitanaquerine aanaquerone Cajón.”

⁸Ari imajeitaquero icantaqueriri Josué. Yora antaveeyetatsiri caratatsiri 7 ijivajeitanaqueri aajeitanaquerori Cajón otimantari Icantacantiri Tasorentsi, aisati itiojeitanaqueri tiorentsipee. ⁹Aisati maaroni shiramparippee manajeitachaneri ijivajeitanaqueri antaveeyetatsiri. Irio pashinippee impoijeitanantsiri, oijajeitaqueriri anatacojeitirori Cajón. Yora antaveeyetatsiri te iroimpacaimateroji itiojeiti. ¹⁰Ari icantasanotaquero Josué manajeitachaneri: “Ariorica ajajeitanaque, ocameetsati pimajerejeitanaque; irosati noncantantempiri, pincajemasanojeite catsini.”

Itsoncajeitaquero ishanincejeitaniri Israel savicajeitatsiri Jericóqui

¹¹Irosati ijatantanaca Josué, icarajeitanaqueri ishanincepee aanaquerori Cajón, ishoncajeitacaro nampitsi. Impoiji ipiajeitanaja isavicajeitaquenta imajeitapaaji. ¹²Ari oquitaiteamanaji capichaji quitaite, itinaamanaja Josué jeri antaveeyetatsiri aapinitirori Cajón. ¹³Aisati iriori caratatsiri 7 antaveeyetatsiri tiotirori tiorentsi jeri iriori shiramparippee manajeitachaneri ijivajeitanaji; aisati impoijeitanaji iriori oijatacoventirori Cajón. Ijajeitanaji aisati ishoncajeitajaro nampitsi. Te irimaoreimateji yaniijeiti, aisati iriori antaveeyetatsiri te iroimpacayeroji itiojeiti. ¹⁴Irosati ipiajeitantanaja isavicajeitaquenta. Aitaque icantapinijeitacari irosati omoncaratantaca 6 quitaiteri.

¹⁵Iro caratapaintsiri 7 quitaiteri, tsiteniquera ijajeitamanaque. Irosati ishoncapinijeitantacaro nampitsi ocarataque 7. ¹⁶Ari itiotasanotanaquero antaveeyetatsiri tiorentsi caratapaintsiri 7, irosati icantantacari Josué ishanincepee. “¡Pincajemasanojeite! Yora Tasorentsi ishinejeitaqueero oca nampitsi antsoncajeitero. ¹⁷Icoacaaquee antsoncasanojeiteri catsini savicajeitatsiri aisati maaroni yashiyetari; irotaque icoacajeitaqueeri. Irointiquea Rahab, antashiyevetariri shiramparippee, eiro airotsi aisati ocarajeitaquero ovancoqui. Tempa irotaque manavaqueriri chapinqui atiancaqueri amenanontaitirori nampitsica. ¹⁸Aisati eiro catsini aajeitavaquetsi yashiyetari savicajeitatsiri; tempa icoasanotaque Tasorentsi antsoncasanojeitero. Ariorica paayetavaque, irotaque iroashinoncaajeitanteeri maaroni. ¹⁹Irintiquea aajeitavaque oro, plata jero vetsicayetachari bronce aisati ashroyetatsiri, anquempoyeero Inantariqui; irotaque ashitacayeariri.”

²⁰Irosati icajemajeitantanaca aisati itiojeitanaquero tiorentsipee opoimatanotanaque. Iquemajeitantavacarori maaroni ishanincepee,

icajemasanojeitanaque catsini; irosati otireantanaca otantotacotaniri nampitsi, oparianaque isaaviqui. Ari ijajeitanaque iqueanaque nampitsiqui. ²¹Yoajeitapaaqueri shiramparipee, tsinaneppee, evancaripee, anteashparipee, aisati ivacatepee, irovishatepee jeri iraashinotepee; itsoncasanojeitaqueri catsini.

²²Impoiji icantiri Josué apitetatsiri amenanontaitirori: “Pijate anta ovancoqui antashiyevetariri shirampari, poimisoquijero aisati maaroni ocarajeitiri. Pimoncaratero picantasanojeitanaquerori.” ²³Irosati yoimisoquijantacaro Rahab, iri, iniro, ojariripee aisati maaroni oshanincaptee. Yaajeitanaquero isavicajeitapaaquenta, yoisavicapaaquero nijanta. ²⁴Irosati itaantanacaro nampitsi aisati maaroni timayetatsiniri. Irintiquea yaayetavaque plata, oro jero vetsicayetachari bronce aisati ashroyetatsiri, iquempeyaquero Inantariqui Tasorentsi. ²⁵Irointiquea Rahab te iroyeroji aisati oshanincasanoripee. Tempa irotaque manavaqueriri amenanontaitirori Jericó itiancaqueri Josué. Irosati isaviquimojeitantacari oshanincajeitaniri Rahab ishanincapteeni Israel.

²⁶Impoiji icantasanoti Josué:

“Iroasanquetayeri Tasorentsi coatsine
irovetsicajero aisati oca nampitsini.
Ariorica irovetsicavetajeero otincami,
incame itomi jivatatsiri itimi.
Aisati ariorica irovetsicavetajeero ashitacoro,
incame iriori impoitatsiri.
Iotiro Tasorentsi oca nocantasanotaqueri,
aitaque omoncarataquea.”

²⁷Yora Tasorentsi quiso yoaqueri Josué, yamitacotaqueri. Yora atiripee savicajeitatsiri nampitsipeequi iquemacojeitaquero imataqueri.

Yoashinoncacantaqueri Acán ishanincaptee

7 ¹Iro cantaincha ainiro aparo ishanincani iriori Judá pajitachari Acán itomini Carmí, icharine Zabdí, icharine iriori Zérah. Yora Acán yaayetavaque paitapeerica icantavetacariri Tasorentsi Josué: “Pintsoncasanojeitero maaroni.” Irotaque icantacantantajeitacariri maaroni ishanincajeitaniri Israel, iquisasanotantacariri Tasorentsi maaroni.

Itiancaque Josué amenanontirori nampitsi Ai

²Yora Josué itiancaque aparopee amenanontirori nampitsi Ai. Iponeanacaro Jericóqui irosati yareetantacaro Ai, montetarori Betel iquenapai catsirincaiteri aisati quempejitarori Bet-avén. Ijajeitantaitari yamenanontaitiro. ³Impoiji ipiajeitajaro, icamantapaaqueri Josué: “Noneaitiro nampitsi, te irishequitasanojeiteji savicajeitatsiri aisati

shentajeitirori. Eiro pitiancajeitiritsi maaroni manajeitachari, moncarataca incarate 2,000 teerica, 3,000 manajeiterine.”

**Yora savicajeitatsiri nampitsiqui Ai
yoarantaqueri ishanincepeeni Israel**

⁴Aitaque ocantacari ijajeitanaque, icarajeivetanaca 3,000 imanajeivetapaacari savicajeitatsiri Ai. Iro cantaincha yanaacojeitavaqueri irinti aisati yoimishiajeitavaqueri. ⁵Yoarantavaqueri icarajeitanaque 36 ishanincepeeni Israel. Aisati yoijanajeitanaqueri shiajeivetanainchari, iponeanacaro ashitacoroqui nampitsi irosati oirincateapai Sebarím. Irotaque icantashirejeitantanacari ishanincepee aisati itsarosanajeitanaque. ⁶Irosati itsereantanacaro Josué itsaare jeri iriori jivatacantajeitatsiri. Aisati itijainajeitanacaro quipatsivane, yoashiretasanajeitanaca. Ari itiyeroajeitanaca quipatsiqui, yoivotashitanacaro Cajón onantari Icantacantiri Tasorensi irosati ishaaviniji. ⁷Ari icantiri Josué Tasorensi:

—¿Notasorensite! ¿Irompa pishinetantaquenari nomonteajeitacaro nija Jordán? ¿Picoaquempa intsoncajeitena amorropee? ¿Ocameetsaveta nosavicajeitapeme intatiqueronta nija Jordán! ⁸¿Notasorensite! ¿Paita noncanteri meeca, paita yanaacojeitantavacariri noshanincepee quisajeitanari? ⁹Ariorica inquemacojeitaquena cananeopee aisati maaroni savicayetatsiri aca, irosati impocashijeitantaquena irimanajeitena. Intsoncajeitaquenarica, tecatsi inquenqueshireacoyeetajeri. ¿Paita incantajeiteri quemacojeitimpiri avirori?

¹⁰Ari icantanaqueri Tasorensi:

—¿Paita pitiyeroashitari quipatsiqui? ¡Pincatianaje! ¹¹Timatsi pishanincepee antajeitaquerori caari cameetsatatsi, te irimoncarajeitero nocantavetaquempiri. Iro cantaincha yaayetavaque paitapeerica intsoncasanotemeri, imanaquero. Itsipataquero yashiyetari iriori, iovetaca te oncameetsate yantaqueri. ¹²Irotaque caari imajeitantari iranaacojeiteri pishanincepee quisajeitimpiri. Yanaacojeitantavacariri irinti, yoimishiajeitavaqueri. Irisati pishanincepee tsoncasantajeitachane. Eirorica meeca pitsoncajirotsi intsipaite nocantaquempiri, eiro quiso noajeitajimpitsi. ¹³Meeca pampatoteri maaroni pishanincepee. Pincantajeiteri irovetsicajeiteata, impocajeitanteari osaitequera irampatotimentena. Tempa narotaque Pitasorensite piquemisantajeitiri, queario nocantaque: ‘Ainiro pishaninca aavaquerori paitapeerica pintsoncasanojeitemeri. Eirorica meeca pitsoncajirotsi timimotaquempiri, eiro pimajeitajirotsi panaacotajeri quisajeitimpiri.’ ¹⁴Ariorica impocajeitamaque maaroni pishanincepee, pinashitacaajeitaqueari aparopee incarajeitavaqueri ishanincasanoripee icharine. Niotacantempiriri jaoca itimiri cantacantajeitaquempiri. Iriotaque pinashitacaajeitaqueari

ishanincapeeni aparopeeni shiramparipee, niotacantempiriri jaanica cantacaacarori. ¹⁵Yora aaquerori nocantasanovetaquempiri; pintsonquero maaroni, ocameetsati pintaacanteri aisati maaroni ishanincasanoripee jero timimoyetiriri. Tempa yantasanotaquero caari cameetsatsi, te irimoncarateroji nocantasanovetaquempiri.

Yoyeetaqueri Acán aisati ishanincasanoripee

¹⁶Ari oquitaiteமானaque capichaji quitaite, itinaamanaca Josué, yapatojeitaqueri maaroni ishanincajeitaniri Israel, inashitacaayetacari ishanincasanoripee. Ari iotacaqueri Tasorentsi Josué, irio antaquerori ishanincasanoripeeni Judá. ¹⁷Irosati yamacantajeitancari ishanincasanoripeeni Judá, ari yamacantaqueri iriori ishanincasanoripeeni Zérah, aisati yamacantaqueri ishanincasanoripeeni iriori Zabdí. ¹⁸Ari ipocapaaque aparopeeni ishanincasanoripeeni Zabdí. Ari inashitacaacarori Acán itomini Carmí, yora Carmí irio itomini Zabdí, yora Zabdí irio itomini Zérah, ishanincasanoripeeni Judá. Ari iotacaqueri Tasorentsi Josué iriotaque antaquerori caari cameetsatsi.

¹⁹Ari icantiri:

—Noshaninca, ocameetsati pimpincatsateri Atasorentsite, nocoli pincamantasanotenaro pantaqueri. ¡Eiro pimanapitsatanarotsi!

²⁰Ari yacanaqueri iriori:

—Jee, queario nantimotaqueri Atasorentsite caari cameetsatsi. Jeroca nantaqueri: ²¹Chapinqui amanajeitancari savicajeitansiri Jericóqui, naavaque quitaarentsi cameetsamaotasantatsiri yovetsicayetiri Babeloniasati jeri imentaqui quireequi icarati 200 aisati oro icarati 600 gramo. Nonevetacari, irotaque nantacariri. Ainiro meeca novancojaniquiqui tsompoina, notijaqueri quireequi aisati iroori quitaarentsi.

²²Irosati itiancantaca Josué aparopee ishaninca ivancojaniquiqui Acán. Ari ineajiro imanavetacari aisati quireequi yoavetacari tsompoina. ²³Ari yaanaqueneri yapatotimentajeitancari Tasorentsi, ineajeitancari maaroni ishanincapee. ²⁴Yora Josué jeri ishanincajeitaniri Israel yaajeitanaqueri Acán oirincatecotapai Acor, aisati yaajeitanaquero imanavetacari jeri iriori itomipee, irishintopee, ivacatepee, iraashinotepee, irovishatepee aisati maaroni timimoyetiriri.

²⁵Ari icantiri:

—¿Paitaquea pantantacarori oca? Poashinoncantaquiteaque. Meeca iroashinoncaasanojeitempi avirori Tasorentsi.

Icantantacariri, irosati ipichaajeitancari aisati ishanincasanoripee, irosati itaajeitancari. ²⁶Imoji ipiojeitancari mapi; irosati ocanta meeca. Aisati iroori oirincatepai, irosati ocanta meeca opajita Acor. Aitaque ocantacari imoncarataquero icantaqueriri Tasorentsi Josué. Irosati icatsimareantaja Tasorentsi iquisajeivetacari ishanincajeitaniri Israel.

**Itsoncajeitaqueri ishanincajeitaniri Israel
savicajeitatsiniri nampitsiqui Ai**

8 ¹Ari icantajiri Tasorentsi Josué: “Eiro pitsaroitsi aisati eiro picantashiretitsi. Ocameetsati pampatojeitajeri pishanincepee, pijate pimanajeitajeri savicajeitatsiri nampitsiqui Ai. Nomatacayempi pintsoncajeitantariri ivincatsarite aisati ishanincepee. Ora inampini aisati iipatsitepeeni irotaque pashijeiteari. ²Ontimatiye pintsoncasanojeiteri savicajeitatsiri nampitsiqui Ai aisati ivincatsarite, piquempejeitaqueri savicantaroniri Jericó aisati ivincatsariteni. Irointiquea yashiyetaniri aisati ivirapeeni, paajeitavaqueri. Povetsicajeitempa pimapocajeitantariri pimanajeiteri, pishoncajeitanaquero acaqueroca nampitsi.”

³Irosati yapatojeitancari Josué ishanincepee irimanajeitantajariri savicantarori Ai. Icoyeajeitaque icarati 30,000 manajeitachaneri. Itiancaqueri tsiteniriqui. ⁴Icantiri: “Pinquemajeitena, pinquenajeitanaque acaqueroca nampitsi, pimanajeitapempa quempeji, aisati povetsicasanojeitapempa pimanajeitantariri. ⁵Iriouea pashinipee, iriotaque noncarajeitanaqueri narori anta nampitsiqui. Ariorica irineajeitavaquena savicajeitatsiri, irishitoashijeitavaquenarica irimanajeitantavaquenari. Impoiji noshiapitsajeitanaqueari, aquempejeitaca chapinqui. ⁶Iroijanajeitanaquena ariorica noshiapitsajeitanaqueari, ijitashijeivetaquea yoimishiajeitavajana. ⁷Irosati pisoquijajeitantanaquea avirori pimanajeitapaacanta, pimanajeitantapemparori nampitsi. Tempa irio Avincatsarite Tasorentsi aquemisantajeitiri, shinejeitaqueeri antsoncajeitantariri. ⁸Ariorica pintsoncajeitaqueri, irosati pintaantajeitanaquearo inampini. Irotaque icantasanotaqueeri Tasorentsi amoncarateri.”

⁹Irosati icantancari Josué: “Meeca pijajeite.” Ari ijajeitanaque imanajeitapaaca onianquirequi Betel jero Ai iqueapinitinta catsirincaite. Ainiroquera irinti Josué, icarajeitaqueri itsipapee anta isavicajeitapaaquenta, imaajeitanaji. ¹⁰Ari oquitaiteamanaque, capichaji quitaite itinaamanaca Josué, yapatojeitamanajiri manajeitachari. Ari ijivatacaajeitanaqueri icarajeitanaqueri jivatacaajeitiriri ishanincepee, irimanajeitantariri savicajeitatsiri nampitsoqio Ai. ¹¹Ijajeitancari, yareejeitapaaca iquempejitapaacaro nampitsi irampatequi acaqueroca imontetapaacaro. Aitaque isavicajeitapaqueri nianqui otimi oirincateacoti nampitsi. ¹²Aisati imanapaaque Josué carajeitatsiri 5,000 manajeitachaneri nianqui nampitsi Betel jero Ai, iqueapinitinta catsirincaiteri. ¹³Aitaque ocantancari inashitacaajeitacari apite. Imanajeitapaaca acaqueroca nampitsi iqueapinitinta catsirincaiteri, irio pashini isavicajeitapaaque irampatequi. Ari yovaajeitanaca Josué tsiteniriqui, irosati nianqui oirincateapai.

¹⁴Ineantacariri pincatsaritatsiri anta nampitsiqui Ai ipocashijeitaqueri, ishintsitanaque isoquijajeitanaque irimanajeitantavaqueariri ishanincapeeni Israel oirincateacotapai nija Jordán. Te iriotacojeiteaji ainiro pashini ishanincapeeni Israel manajeitapainchari acaqueroa inampi.

¹⁵Ineajeitantavacariri Josué, irosati ishiapitsajeitantanacari anta caaraiteriqui.

¹⁶Ari icantiri pincatsari manajeitachari: “¡Pijajeite, poijanajeitanaqueri!” Irosati yojjanajeitantanacari maaroni Josué jeri manajeitachari carajeitiriri, yojocajeitanaquero inampi. ¹⁷Te intimanaji aparoni shirampari savicanajatsine nampitsiqui Ai aisati nampitsiqui Betel, maaroni yojjanajeitanaqueri ishanincapeeni Israel. Irointita iquenqueshireajeitiro iroijanajeitanaqueri, tecatsi shentajeitanajerone nampitsi. ¹⁸Irosati icantantacari Tasorentsi Josué: “Poanquero meca pisataamento, pijicotero Ai; noshinetaquempiri pimanajeiteri savicajeitatsiri, pintsoncajeiteri.”

Irosati yoancantanacaro isataamento, ijicotaquero Ai, irimanajeitanteariri. ¹⁹Ineajeitantacarori manajeitainchari, intsipaite isoquijajeitanaque, irosati iqueajeitantanaca nampitsiqui, yoajeitapaaqueri savicajeitatsiri aisati itaapaaquero nampitsi.

²⁰Ipitsocantajeitanacari oijanajeivetanacariri Josué, ineajeitatiro inampi ocachaajencatanaque jenoqui. Tecatsi inquenajeitanaque irishiajeitanaque; tempa ipiajeitacari ishanincapeeni Israel shiajeivetanainchari, imanajeitaqueri. ²¹Ineantacarori Josué jeri manajeitacharini carajeitiriri itaapaaquero nampitsini yora manajeitapainchari, irosati ipiashijeitantapaacari imanajeitapaaqueri savicantaroniri Ai. ²²Impoiji isoquijajeitanaji iriori taaquerori, iticaajeitavaqueri eiro imatantatsi irishiajeitanaque. Impoiji itsoncajeitaqueri yoajeitaqueri. ²³Irintiquea ivincatsarite te iroyeriji, yaanaqueneri Josué.

²⁴Itsoncajeitantacariri yoajeitaqueri oijanajeivetanacariri, irosati piashijeitantacari nampitsiqui, yoajeitapaaqueri timaarantavetanainchari.

²⁵⁻²⁶Ora quitaiteri imanajeitantacarori nampitsi Ai, icamajeitaque caratatsiri 12,000 savicajeitatsiniri shiramparipee aisati tsinaneppee. Tempa icantani Josué yoancaquero isataamento irosati itsoncasanojeitantacari maaroni. ²⁷Ari yaajeitanaqueri ivirapeeni aisati maaroni timimoyetiriniri. Imoncarataquero icantaqueriri Tasorentsi Josué. ²⁸Aitaque ocantacari itaajeitaquero nampitsini, otireayetanaque otantotacaroni. Irosati ocanta meca. ²⁹Yora pincatsaritatsiniri itsatacantaqueri Josué inchatoqui, irosati ishaaviniji catsirincaiteri. Impoiji iqueanaji, yoaniireacantajiri inareanaqueri iqueantapinitorori inampini aisati ipiotantanacanari mapi. Irosati ocanta otimi opiota.

Ineanatiniri Josué ishanincapee Icantacantiri Tasorentsi toncaariqui Ebal

³⁰Impoiji yovetsicantaque Josué altar otiminta toncaari Ebal, itaaueneri Tasorentsi ivirapee. ³¹Tempa irotaque icantanaqueriri

Moiseshini, quemisantiriri Tasorensi, irimoncaratacayeriri ishanincajeitaniri Israel isanquenatacotanaqueri Moiseshi: “Povetsiquena altar, eiro poameetsayetirotsi mapipee.” Ari itaasanojeitaqueneri Tasorensi ivirapee aisati yoajeitaqueneri iraacameetsajeitantajeariri. ³²Impoiiji isanquenataquero Josué mapiniqui icantacantayetiri Tasorensi, ineacojeitaqueri ishanincapee. ³³Ari icatiimojeitapaacaro maaroni atiri Cajón ontimantari Icantacantiri Tasorensi: jivatacantajeitatsiri, cantacoventantatsiri aisati pashinisatipee saviquimoyetiriri Imonteajeitapaacari antaveeyetatsiri quijacotirori. Inquemantearori tasoncacoventantsi, icatiimotaarantacaro cashetani toncaari Guerizim. Irio pashini catiimotaarantacarori toncaari Ebal. Imoncarataquero icantaqueriri Moiseshini, quemisantiriri Tasorensi.

³⁴Impoiiji ineanajeitaqueneri Josué aparopeeni icantacantayetiri Tasorensi, cantacotirori jaoca incanteari itasoncacoventajeitantariri, aisati paita irosanquejeitantariri. ³⁵Itsoteasanotaqueneri ineanataqueneri maaroni ishanincapee isanquenatacaaqueriri Tasorensi Moiseshini; tecatsi impeacotaquea. Iquemajeitavaquero shiramparipee, tsinanepée, jananequipee aisati pashinisatipee saviquimoyetiriri.

Yamatavitaqueri savicantarori nampitsi Gabaón ishanincapeenii Israel

9 ¹⁻²Yora pincatsariyetatsiri hititapee, amorreopee, cananeopee, ferezeopee, heveopee jeri jebuseopee iquemacojeitantarori avisaintsiri anta nampitsiqui Jericó; irosati yapatojeitantanaca maaroni irimanajeitantavaqueariri ishanincajeitaniri Israel. (Yora pincatsaripee isavicajeiti acaqueroca, otsapijapeequi nija Jordán iqueapinitinta catsirincateri, aisati toncaaripeequi aisati opampaiteyetapai jero aisati otsapijayetapaaque incajare Mediterráneo irosati otishiyetapai Líbano.) ³⁻⁵Irintiquea heveopee, savicajeitatsiri nampitsiqui Gabaón, iquemacojeitantarori itsoncajeitaqueri savicajeitatsiniri nampitsipeequi Jericó aisati Ai, iquenqueshireajeitanaca; icanti: “Tsame amataviteri, eiroquea yoajeitantapeetsi arori.” Irosati itiancantajeitaca jatashitaqueriri Josué. Iquitsayetanaca tsereyetsiri maatsarantsi aisati isapatotashiyetanacari peesati. Aisati yoanquetantashijeitanacari iraashinotepee peesato coshitaari jeri meshinantsi oaviyetachari yaacojatantanacari ovaja, aisati yaanontanaca tanta poayetanaaintsiri. ⁶Yareetantajeitapaacarori Guilgal isavicajeitaquenta Josué jeri ishanincapee; icantajeitapaqueri:

—Narovee ashaninca, noponeajeita areejiqui. Nocoli
ancantavacaasanojeitea amoncarajeitero aacameetsatavacaajeitea.

⁷Ari yacanaqueri Josué jeri ishanincapee. Icantiri:

—Naamaaca piponeajeitaca quempeji, eiro nomajeitirotsi
nomoncarajeitero acantavacaajeitacari.

⁸ Icantajeitanajiri iriori:

—Queario, nocoi noncarajeitempi, nantaveejeitempi.

Ari isampitasanotaquero iriori Josué:

¿Jaocampa pijijeitari? ¿Jaoca piponeasanojeitari?

⁹⁻¹⁰ Yacajeitanaquero iriori:

—Noponeajeitaca areejiqui. Iro nopocasanotantacari, noquemacotaquero yora Pivincatsarite Tasorentsi, oshequi imatacaayetaquempi anta Egiptoqui. Aisati pitsoncajeitanaquero apitetatsiri pincatsari amorropee, yora Sihón, pincatsarivetironiri inampi Hesbón aisati Og, pincatsarivetironiri inampi Basán, savicatsiniri Astarot antaqueronta nija Jordán. ¹¹ Irotaque itiancantaquenari jivatacaajeitanari aisati noshanincapee. Icantajeitana: ‘Nocoi pijajeite isavicajeitapaaquenta ishanincapeeni Israel. Paanontayetanaquea poajeitanaqueari nianqui. Pincantapeeri: Nocoajeitaque noncarajeitempi, nantaveejeitempi.’ ¹² Jero meeca oca tanta namanontayevetacari nopocantacari nocoajeitimpi. Iro cantaincha quisoyetanaque aisati poanaque. Namantacarori catsirincatsi iroquera otashitanaca. ¹³ Aisati oquempetaca oca meshinantsipee namacojatantacari ovaja, tsereacoyetanaque. Namantacarori iroaquerapee onaveta. Aisati oquempetaca noitsarepeeca jeri nosapatotepeeca, tsereayetanaque; tempa noponeaca areejiqui.

¹⁴ Ineantacarori Josué jeri carayetiriri itantane, irosati ishirejeitantanacari. Iro cantaincha te inquenquetsatacayeriji Tasorentsi.

¹⁵ Irosati icantasantantacari Josué:

—Aitaque naacameetsajeitaquempi, eiro noajeitimpitsi. Yora Tasorentsi iquemajeitaquena nocantaquempiri aisati itsipapee jivatacantajeitatsiri.

Irosati ipiajeitantanaja. ¹⁶ Ari avisanaque mava quitaiteri, irosati iquemantaca ishanincajeitanari Israel, icanteetiri: “Irinti pocaitatsi savicatsiri nampitsiqui Gabaón, iriotaque pisaviquimojeitapaaquero quempeji.” ¹⁷ Irosati ijajeitantanaca irameneri, ocarataque mava quitaiteri yareetantacarori inampipee: Gabaón, Quefirá, Beerot jero Quiriat-jeirim. ¹⁸ Iro cantaincha te iroajeitaiteriji, tempa icantasanojeitavaquero jivatacantajeitatsiri. “Aitaque aacameetsatavacaajeitaquea, eiro noajeitimpitsi. Iquemajeitaquena Tasorentsisanori, iriotaque Atasorentsite.”

Irotaque yora ishanincapee icantimajeitantanacariri yora jivatacaajeitiriri. ¹⁹ Iro cantaincha icantanaquero iriori:

—Queario, iquemajeitaquena Atasorentsite aquemisantajeitiri nocantasanojeitavaquero: ‘Eiro noajeitimpitsi.’ Irotaque meeca eiro amajeitantaritsi amanajeiteri. ²⁰ Incanteata irisavicajeiteta, iquisajeiteecari Tasorentsi eirorica amoncaratirotsi acantasanojeitaveriri.

²¹Ari icantasanojeiti jivatacantatsiripee: “Eiro avajeitiritsi. Irointiquea amperanajeiteari, aayeteeneri tsitsipee aisati aacojayeteeneri nija.” Aitaque ocantacari imoncarataquero icantasanojaqueri.

²²Ari icajemacantaqueri iriori Josué savicajeitatsiri nampitsiqui Gabaón. Yareejaitantapaacari, icantavaqueri Josué:

—¡Paitaquea pamatavijeitantaquenari! Picantajeitaquena: ‘Noponeajeita areejiqui.’ Jaa, te pimponeimateaji, aiquetiji pisavicajeiti quempeji.

²³Meeca eiro pisavicajeitajitsi cameetsa, pincanteani nomperanajeitempi. Pintsimatapinijeite aisati paocojatapinijeitena nija timatsineri Inantariqui Notasorensite.

²⁴Ari icantajeitanaqueri iriori:

—Iro namatavitantaquemperi, notsaroocajeitaquempi poajeitena. Tempa noquemacotaqueri Pivincatsarite Tasorensi piquemisantajeitiri icantasanojaqueri Moiseshini, quemisantiriri, impajeitempiro maaroni oca quipatsi aisati pintsoncajeiteri savicantajeivetarori. ²⁵Jerocana meeca onimojeitaquena picantaquenari; ocameetsati nantajeitempiro paitarica pincoocajeitenari.

²⁶Iquemantacarori Josué icantaqueriri, te irishineteriji ishanincapee iroajeiteri. ²⁷Irointiquea imperanajeiteari aayetenerine tsitsipee jero nijapee irashipee maaroni ishaninca aisati ashi altar intaantapiniteanariri ivirapee Tasorensi jaocarica incoyeaque irinanteari. Irosati icantajeita meeca yantaveetiniri.

Imanajeitaqueri ishanincajeitaniri Israel yora amorreopee

10 ¹Yora Adonisédec, pincatsaritatsiri anta nampitsiqui Jerusalén, itsaroasanotanaque iquemacotantacariri Josué jeri manajeitacharini carajeitiriri, itsoncajeitaqueri savicatsiniri nampitsipeequi Ai aisati Jericó jeri ivincatsaritepee. Aisati iquemacotaqueri savicajeitatsiri nampitsiqui Gabaón, icantaqueri ishanincajeitaniri Israel: “Tsame aacameetsatavacaajeitea.” Meeca icarajeitaqueri. ²Oshequi catsini itsaroasanojeitanaque, tempa antearoite nampitsi Gabaón, te onquempetearoji Ai, te antearoteji. Timatsi ivincatsarite, aisati oshequi ineaperojeita savicajeitatsiri Gabaón. ³Irotaque itiancasantacananariri irineane pincatsariyetatsiri: yora Hoham pincatsariventirori Hebrón, Piram pincatsariventirori Jarmut, Jafia pincatsariventirori Laquis jeri Debir pincatsariventirori Eglón. ⁴Icantiri: “Pimpoque aca, pamitacojeitena. Tsame amanajeiteri savicantajeitarori Gabaón, icarajeitaqueri Josué jeri ishanincapee.” ⁵Irosati yora pincatsaripee amorreo caratatsiri 5: pincatsariventayetirori nampitsipeequi Jerusalén, Hebrón, Jarmut, Laquis jero Eglón yapatojeitantanaca oshequi manajeitachari. Ari ijajeitanaque isaviquimojeitapaaquero quempeji Gabaón, irimanajeitanteariri.

⁶Iotacojeitancari savicajeitatsiri nampitsiqui Gabaón, intsipaite itiancantaqueneri irineane Josué, isavicajeitaquenta inampiqui Guilgal; icantiri: “Eiro piquisotanaquetsi pamitacojeitena. ¡Intsipaite pimpoajeite pimpiacoventajeitena! Yora maaroni pincatsaritatsiri amorropee savicajeitatsiri toncaaripeequi yapatotimentajeitaquena irimanajeitena.” ⁷Irosati ijatantanaca Josué aisati maaroni manajeitachari neaperoyetachari, iponeajeitanaca inampiqui Guilgal. ⁸Ari icantiri Tasorentsi: “Eiro pitsaroacaajeitaritsi, noshinetaquempi pintsoncajeiteri avinti, tecatsi pajeitavaquempine.”

⁹Iponeajeitancari inampiqui Guilgal, ijajeitaque. Tsiteniriqui imapocajeitaquero imanajeitapaquero amorropee. ¹⁰Ari icantashireacaajeitacari Tasorentsi, itsaroacaasanojeitancavacari ishanincajeitaniri Israel. Imanajeitancari savicayetatsiri nampitsiqui Gabaón, yoajeitaque oshequi catsini amorropee. Impoiji yojanajeitanaquero shiajeivetanainchiri avotsiqui jatantachari nampitsiqui Bet-horón. Aitaque yoarantayetavajiriri pashini, irosati nampitsipeequi Azecá aisati Maquedá; ¹¹Yora pashinipee oirincajeivetanainchiri otapiitetapei Bet-horón, itiancaqueneri Tasorentsi antearoinapee iriniqui oquempyetacaro mapipee oajeitapaquero, oshequi catsini camajeitaintsi, anaacotaquero yoajeivetacari ishanincapeeni Israel.

¹²Ishinejeitancari Tasorentsi ishanincajeitaniri Israel itsoncajeitaquero amorropee, yora ishanincapee Josué iquemajeitaquero icantiri Tasorentsi:

“Intimavaquetsita catsirincaiteri anta jenoqui nampitsiqui Gabaón, aisati cashiri intimavaquetsita aisati jenoqui oirincateacotapai Aialón.”

¹³Yora catsirincaiteri aisati cashiri te irishevatajeaji, irosati itsoncajeitancari ishanincapeeni Israel quisajeitiriri.

Irotaque ocantiri Isanquenare Jaser. Yora catsirincaiteri iquisotapaquero nianqui inquite; irovetaincha omoncarateame aparo quitaiteri te inqueimateji. ¹⁴Oca imataquero Tasorentsi, iquemisantaquero icantaqueriri atiri quemisantiriri, te irineimateroji peeraniniri quempetarori oca. Aisati tecatsi neimaterone coajicani; tempa Tasorentsi yamitacojeitaquero ishanincajeitaniri Israel, imanacoventajeitaquero.

¹⁵Ari ipiajeitaja Josué jeri manajeitachari carajeitanajiri anta inampiqui Guilgal. ¹⁶Yora pincatsaripee caratatsiri 5 ishiajeitanaca irinti imanapaaca omoroqui imperita anta nampitsiqui Maquedá. ¹⁷Impoiji ineetajiri, irosati icamantanteetajiri Josué. ¹⁸Iquemantacari, irosati icantancari aparopee ishaninca: “Pintivironque mapipee, pashitacotasanoteri aisati poanaque shentajeiterine. ¹⁹Avintiquea, eiro pisavicajeititsi aca; pijajeite poijanajeitanaquero quisajeiteeri, pimanajeitancavacari. Eiro

pishinejeitiritsi irarejeitajea inampipeequi, tempa ishinetaqueeri yora Atasorentsita aquemisanta jeitiri, antsoncajeitantariri.”

²⁰ Itsoncantasanojeitacariri Josué aisati ishanincepee yora amorroopeeni, yoajeitaquero oshequi catsini, yora itsipapee caari yoyeeti itsitejeitapaaja inampipeequi. ²¹ Ari ipiajeitajaro manajeitachari nampitsiqui Maquedá, isavicaquenta Josué; tecatsi oarantajeiterine irinti. Tecatsi materine incantimayeeteri ishanincepeeni Israel.

²² Irosati icantantacariri Josué: “Pintivironcajero mapipee, poimisotoyeri pincatsaripee caratatsiri 5.” ²³ Irosati itivironcantacaro, yoimisotoajeitaquero pincatsariyetatsiri anta nampitsipeequi Jerusalén, Hebrón, Jarmut, Laquis jero Eglón. ²⁴ Ari yaajeitancanariri Josué, icajemajeitaquero maaroni manajeitachari. Icantiri yora jivatacaajeitiriri: “Caate, paaticasanojeiteri pincatsaripeeca.” Ari yaaticajeitaquero. ²⁵ Aisati icantaquero: “Eiro pitsaroajeititsi aisati eiro picantashirejeititsi; irointi pishintsishirejeitanaque. Iriotaque Tasorentsi matacaajeiteerine amajeitantariri quisajeiteeri.” ²⁶ Irosati yoantacariri Josué, aisati itsatacantajeitaquero aparopeeni inchatoqui irosati ishaaviniji. ²⁷ Ari irotimataintsi inqueaje catsirincaiteri, irosati yoaniireacantantajari, yoiminqueajiri aisati omoroqui imperita imanantavetapaacari. Impoiji yashitacotaquero antero mapipee, irosati ocanta meeca otimi.

Imanajeitaquero otsipapee nampitsi

²⁸ Ari imanajeitaquero iriori savicajeitatsiri nampitsiqui Maquedá, itsoncasanojeitaquero maaroni, yoajeitaquero. Tecatsi catsini timanajantsine aisati ivincatsarite, iquempeetaquero pincatsariventironiriri Jericó.

²⁹ Itsoncajeitantanacariri, irosati yovaajeitantanaca nampitsi Libná, imanajeitapaquero iriori savicajeitatsiri. ³⁰ Ishinetaquero Tasorentsi itsoncasanojeitantariri maaroni, yoajeitaquero. Tecatsi catsini timanajantsine aisati ivincatsarite, iquempeetaquero pincatsariventirorini Jericó. ³¹ Itsoncajeitantanacariri savicajeitatsiniri nampitsi Libná, irosati yovaajeitantanaca nampitsi Laquis, ivancotimojeitapaacari quempeji, irimanajeitantariri iriori savicajeitatsiri. ³² Ari apitetanaque quitaiteeri irosati imanajeitancari. Ishinetaquero Tasorentsi itsoncajeitantariri yoajeitaquero maaroni savicajeitatsiri nampitsiqui Laquis aisati ivirapeeni. Iquempejeitaquero savicajeitatsiniri nampitsiqui Libna. ³³ Iquemacotantacariri Horam, pincatsariventirori onta nampitsiqui Guézer, irosati ipocantavetaca. Yamajeivetacari oshequi manajeitachari iramitacojeiterime. Iro cantaincha itsoncajeitavaquero iriori Josué, tecatsi timanajantsine.

³⁴ Itsoncajeitantanacariri, irosati yovaajeitantanaca nampitsi Eglón, ivancotimojeitapaacari quempeji, irimanajeitantariri savicajeitatsiri.

³⁵Irosati quitaiteri yoantajeitacariri maaroni savicantajeitarorini nampitsiqui Eglón, itsoncasanojeitantaqueri catsini, iquempejeitaqueri savicajeitatsiniri Laquis.

³⁶Iponeanajaro Eglón, irosati imanajeitapaaqueri iriori savicajeitatsiri nampitsiqui Hebrón. ³⁷Itsoncasanojeitaqueri, yoaqueri ivincatsariteni jeri maaroni savicayetatsiri aisati maaroni ivirapeeni. Aisati iquempeyetanaquero pashinipee nampitsi tsipanampiyetaroniri, iquempejeitanaqueri savicajeitatsiniri Eglón.

³⁸Itsoncajeitantanacariri, irosati iquenajeitantanacaro nampitsiqui Debir, imanajeitapaaqueri iriori savicajeitatsiri. ³⁹Yoajeitapaaqueri iriori savicajeitatsiri aisati ivincatsariteni. Aisati iquempeyetanaquero nampitsipee tsipanampiyetaroniri, itsoncasanojeitanaqueri catsini. Tecatsi timanajantsine, iquempeyetanaqueri savicayetatsiniri nampitsipeequi Hebrón jero Libná, yoajeitanaqueri ivincatsaritepeeni.

⁴⁰Aitaque icantajeitacari Josué imanajeitaqueri savicayetatsiri nampitsipeequi. Itsoncajeitaqueri pincatsaripeeni aisati manajeivetacharini carajeivetarini savicayetatsiniri toncaaripeequi, quipatsiqui Négueb, ovinteniiteayetapai jero oirincaiteayetapai. Itsoncasanojeitaqueri, yoajeitaqueri, tecatsi timanajantsine. Imoncarataquero icantaqueriri Tasorentsi yora iquemisantajeitiri ishanincajeitaniri Israel. ⁴¹⁻⁴²Itsoncantacariri yoajeitaqueri pincatsariyetatsiniri aisati yaajeitaquero iipatsitepeeni, oponeanaca Cadés-barnea, Gaza, aisati Gosen irosati nampitsiqui Gabaón; tempa yamitacojeitaqueri Tasorentsi yora iquemisantiri ishanincajeitaniri Israel, imanacoventajeitaqueri. ⁴³Irosati ipiatanaja Josué inampiqui Guilgal, icarajeitanajiri maaroni manajeitachari.

Itoncajeitaqueri Josué Jabín jeri amitacojeivetariri

11 ¹Iquemantacari iriori Jabín pincatsariventirori anta nampitsiqui Hasor, itsoncajeitaqueri ishanincajeitaniri Israel savicayetatsiniri nampitsipeequi, irosati itiancacantantacanari camanterineri Jobab, pincatsariventirori anta nampitsiqui Madón jeri yora pincatsariventirori anta nampitsiqui Simrón aisati iriori pincatsariventirori anta nampitsiqui Acsaf, ²aisati iriori maaroni pincatsariyetatsiri toncaaripeequi catoncoquiniri, jero oirincaiteacotapai nija Jordán, oquirincatanaque incajare Quinéret, opampaiteyetapai aisati quempejitarori nampitsi Dor irosati anta iqueapinitinta catsirincaiteri, ³aisati iriori cananeopee savicajeitatsiri anta isotoapinitinta catsirincaiteri aisati anta iqueanajinta, aisati iriori amorreopee, hititapee, ferezeopee, jebuseopee savicayetatsiri toncaaripeequi, jeri iriori heveopee saviquimoyetirori toncaari Hermón Mizpáquiniri. ⁴Yocapee pincatsariyetatsiri yapatojeitaqueri maaroni manajeitachari carajeitiriri, oshequi catsini

iyavaayotepee jero ishiacomentopee. Icarajeitaqueri oshequi catsini manajeitachari, iquempjeitacaro impanequi timatsiri otsapijaqui incajare, eiro amatiritsi ayojeiteri jaocarica icarajeitiri. ⁵Maaroni yocapee icantavacaajeitaca: “Tsame amitacotavacaajeitea.” Irosati ijajeitantanaca ivancotimojeitapaacaro nijapee quipatsiquiniri Merom, irimanajeitanteariri ishanincajeitaniri Israel.

⁶Ari icantiri Tasorentsi Josué: “Eiro pitsarocaajeitaritsi, tempa osaitequera, oquempetaca meeca, noshinetaquempiri pintsoncajeiteri maaroni, poajeiteri. Impoiji pincarajitayeteri iitipee iyavaayotepee aisati pintaitayeteri ishiacomentopee.”

⁷⁻⁸Irosati ijatantanaca Josué, icarajeitanaqueri manajeitachari, yareejeitacaro nijapee quipatsiquiniri Merom isavicajeitapaaquenta. Ari imapocaqueri imanajeitapaaqueri, imatacaasanojeitaqueri Tasorentsi yanaacojeitantacariri. Aiquero ijatatii yoijanajeitanaqueri irosati antearoitequi nampitsi Sidón aisati Misrefot-maim, irosati opampaiteapai Mispá timatsi isotoapinitinta catsirincaiteri. Itsoncajeitaqueri catsini, tecatsi timanajantsine. ⁹Ari imoncarataquero Josué icantaqueriri Tasorentsi. Icarajitayetaqueri iitipee iyavaayotepeeni quisajeitiriri aisati itaaquero ishiacomentopeeni.

¹⁰Ipiajeitantajarori, irosati imanajeitantanacaro nampitsi Hasor, yoaqueri pincatsaritatsiniri. Ora nampitsi irotaque antearoitetsiniri, aitaque yapatojeitaniri pincatsariyetatsiniri yacacotavacaajeitantari.

¹¹Itsoncasanojeitaqueri, yoajeitaqueri savicajeitatsiniri aisati itaanaquero inampini. ¹²Aisati iquempyetanaquero otsipapee nampitsi isavicantayetari pincatsariyetatsiniri acacoyevetacariri, itsoncasanojeitanaqueri catsini. Imoncarataquero icantanaqueriri Moiseshini, quemisantiriri Tasorentsi. ¹³Iro cantaincha te intayeroji nampitsipee timayetatsiri toncaaripeequi, apatiro itaaquero nampitsini Hasor. ¹⁴Ari itsoncasanojeitaqueri, yoajeitaqueri savicajeitatsiniri nampitsipeequi, tecatsi timanajantsine. Irosati yaajeitantacaro iipatsitepeeni jeri ivirapeeni aisati paitapeerica yashiyetaniri.

Imoncarataquero Josué icantanaqueriri Moiseshini

¹⁵Ari imoncarataquero Josué icantaqueriri Tasorentsi Moiseshini, tecatsi impeacotaquea aparoni. ¹⁶Aitaque icantajeitacari Josué jeri ishanincapee, imanatacoventaquero maaroni toncaaripee, quipatsi Négueb aisati Gosen jero opampaiteacoyetapainta nija Jordán, jero aisati maaroni toncaaripee jero pampaitepee isavicajeitapaaquenta ishanincapeeni Israel. ¹⁷⁻¹⁸Oponeanaca toncaariqui Halac, oquempjeitapai Seír, irosati Baal-gad opampaiteayetapai otishi Líbano, aisati oirincaiteapaaca toncaari Hermón. Icantani imanajeitaqueri ishanincajeitaniri Israel, irosati itsoncantajeitacariri aisati yoajeitaqueri

maaroni pincatsariventayetironiri quipatsipee ¹⁹Tecatsi catsini iraacameetsajeitaque savicajeitatsiri nampitsipeequi. Apatiro yaacameetsajeitaquero heveopee savicajeitatsiri nampitsiqui Gabaón. Irintiquea pashinipee itsoncajeitaquero. ²⁰Iriotaque Tasorentsi cantacaashireacaacariri iquisoshiretantanacari imanajeitantacariri ishanincapeeni Israel, itsoncasanojeitantacariri irinti. Te incavintsaajeiteriji. Imoncarataquero icantaqueriri Tasorentsi Moieshini.

²¹Aisati imanajeitaquero Josué ishanincapeeni Anac savicajeitatsiniri nampitsipeequi toncaariquiniri Hebrón, Debir, Anab aisati maaroni toncaaripeequiniri savicayetatsiri iipatsitepeeniqui Judá jeri maaroni ishanincapeeni Israel. ²²Itsoncasanojeitaquero. Tecatsi timanajantsine ishanincapeeni Anac yora antearitsantsayetatsiniri maaroni anta iipatsitequi ishanincajeitaniri Israel. Apatiro itimayetanaque nampitsipeequi Gaza, Gat aisati Asdod.

²³Aitaque icantajeitacari Josué imanatacoventajeitaquero maaroni quipatsi, yaasanojeitantacarori. Imoncarataquero icantaqueriri Tasorentsi Moieshini. Ari ipavacaayetacaro quipatsi aparopee ishanincasanoripee isavicantajeitacari, aisati irisavicajeitanteari coajicani. Impoiji isavicasanojeitanaque cameetsa, te irimanajeitajeaji aisati.

Quipatsipee imanatacoventajeitanaquero Moieshini

12 ¹Yora ishanincajeitaniri Israel itsoncajeitanaquero pincatsariyetatsiniri savicayetatsiniri antaqueronta Jordán, oponeanaca iipatsiteni nijaqui Arnón, irosati toncaariqui Hermón aisati maaroni oirincateacotapai nija Jordán, isoapinitinta catsirincaiteri.

²Itsoncajeitanaquero Sihón, yora amorreo pincatsaritatsiniri anta inampiniqui Hesbón. Oponeanaca iipatsiteni ipincatsariventiniri nampitsiqui Aroer timatsiri otsapijaqui Arnón. Oponeanaja aisati nianqui oirincateapai, irosati nijateniqui Jaboc, overapaaca iipatsite iriori ishanincapeeni Amón (onianquitapai Galaad). ³Irosati ojatanaque oirincateacotapai nija Jordán antaquerontinta isoapinitinta catsirincaiteri, oponeanaca incajarequi Quinéret, irosati incajarequi Catiojari. Aisati ojatanaque Bet-jesimot catonco, irosati oirincateapaaca toncaari Pisgá.

⁴Aisati itsoncajeitanaquero Og pincatsariventironiri Basán. Iriotaque apanivanitatsiniri refaitapee savicayetatsiniri Astarot aisati Edrei.

⁵Oponeanaca iipatsite iriori ipincatsariventiniri toncaariqui Hermón, irosati Salcá aisati maaroni inampiqui Basán, irosati overapaaca iipatsite iriori Guesur aisati Maacá, irosati onianquirequi Galaad, overapaaca iipatsiteni Sihón, pincatsaritatsiniri inampiniqui Hesbón.

⁶Yora Moieshini jeri ishanincajeitaniri Israel itsoncajeitaquero yoajeitaquero pincatsariyetatsiniri. Impoiji ipajeitaquero iipatsitepeeni ishanincasanorini Rubén jeri Gad aisati ipaarantaquero ishanincasanorini iriori Manasés.

Quipatsipee imanatacoventajeitaqueri Josué

⁷Yora Josué jeri ishanincajeitaniri Israel, itsoncajeitaqueri pincatsariyetatsiniri savicayetatsiniri quipatsiqui otsapijaqui Jordán iqueapinitinta catsirincaiteri. Oponeanaca iipatsiteni Baal-gat oirincaiteapai otishi Líbano, irosati toncaariqui Halac irosati quipatsi Seír. Irotaque oca ipayetanaqueriri Josué ishanincasanoripee isavicajeitantacari aisati irisavicajeitantajeari irishanincajeitajeari coajicani. ⁸Jero otsipa quipatsipeeni pincatsariyetatsiniri toncaariquiniri, oirincaiteacotapai nija Jordán oirincaiteayetapaaca toncaaripee, ocaaraiteayetapai jero néguebiquiniri. Irotaque iipatsitepee hititapee, amorreopee, cananeopee, ferezeopee, heveopee jeri jebuseopee.

⁹Jeri pincatsaripee itsoncajeiteetanaqueri, pincatsariventironiri nampitsipeequi:

Jericó, Ai quempejitarori Betel,

¹⁰ Jerusalén, Hebrón,

¹¹ Jarmut, Laquis,

¹² Eglón, Gezer,

¹³ Debir, Gueder,

¹⁴ Hormá, Arad,

¹⁵ Libná, Adulam,

¹⁶ Maquedá, Betel,

¹⁷ Tapúah, Héfer,

¹⁸ Afec, Sarón,

¹⁹ Madón, Hasor,

²⁰ Simrón-merón, Acsaf,

²¹ Taanac, Meguido,

²² Quedes, Jocneam ora toncaariquiniri Carmelo,

²³ Dor quipatsiquiniri pajitachari Dor,

Goím ora nampitsiquiniri Guilgal,

²⁴ jero Tirsá.

Icarajeiti 31 pincatsaripeeni yapatoajeitanaca.

Quipatsi caari imanatacoventajeiti

13 ¹Ari anteashipatasanotanaque ini Josué, icantiri Tasorentsi: “Meeca anteashipatasanotanaquempi, ainiroqueratatsi oshequi quipatsi tequera pintsonquero pimanatacoventero. ²⁻⁴Ainirotatsi maaroni quipatsi isavicajeitantari filisteopee aisati guesureopee, oponeanaca nijaqui Sihor, otsapiqui Egipto isoapinitinta catsirincaiteri, irosati overapaaca nampitsi Ecrón catonconiri, irotaque aisati iipatsite cananeopee, aitaque isavicayetiri filisteopee caratatsiri ⁵jivatacantayetatsiri nampitsipeequi: Gaza, Asdod, Ascalón, Gat jero Ecrón. Ainirotatsi aisati isavicajeitantari iriori aveopee oquirincatanaque. Irotaque iipatsite maaroni cananeopee

oponeanaca inampipeequi savicajeitatsiri sidonosatipee, irosati Afec otsapitapaaca iipatsite amorreopee. ⁵ Ainirotatsi aisati isavicajeitantari giblitapee jero maaroni otishiqui Líbano irosati isotoapinitinta catsirincaiteri aisati oponeanaca Baal-gad, oirincaiteapaaca toncaari Hermón, irosati iqueapiniyeetaroriqui Hamat. ⁶ Nomatacaajeitempi pojocajeiteri maaroni savicajeitatsiri nampitsiqui Sidón aisati maaroni savicajeitatsiri toncaaripeequi poneanainchari otishiqui Líbano irosati Misrefot-maim. Avirori payeterine ishanincajeitaniri Israel quipatsi, irashitasanotantearori. Pimoncaratero nocantaquempiri. ⁷ Ocameetsati meeca pimpayeri caratatsiri ⁹ pishanincasanoripee aisati timaarantaintsiri ishanincasanoripeeni iriori Manasés.”

Quipatsi intatiqueroniri nija Jordán

⁸ Yora ishanincasanoripeeni Rubén, Gad jeri cashetatatsiri ishanincasanoripeeni Manasés, ipanaqueri Moiseshini quipatsi intatiqueroniri nija Jordán, isotoapinitinta catsirincaiteri. ⁹ Oponeanaca nampitsiqui Aroer timatsiri otsapijaqui Arnón aisati ipayeetaqueri nampitsi timatsiri nianqui oirincaiteacotapai aisati maaroni opampaiteti jenoqui toncaari Medebaquiniri irosati Dibón. ¹⁰ Apatoanaca maaroni inampipeeni Sihón, yora ishaninca amorreopee pincatsaritatsiniri nampitsiqui Hesbón, irosati overapaaca inampi ishanincajeitaniri Amón. ¹¹ Aisati ipayeetaqueri quipatsi Galaad, iipatsite guesureopeeni jeri maacateopeeni, irosati toncaariqui Hermón jero maaroni quipatsi Basanquiniri irosati Salcáqui. ¹² Apatoanaca ipincatsariventiniri Og pincatsariventironiri Basán aisati Astarot jero Edrei. Iriotaque apanivanitatsiniri refaitapee itsoncajeitanaqueri Moiseshini. ¹³ Irintiquea guesureopee aisati maacateopee, te intsoncajeiteriji irinti. Iriotaque saviquimojeitiriri ishanincajeitaniri Israel irosati icanta meeca.

¹⁴ Irintiquea ishanincasanoripeeni Leví te imperiji iipatsite, tempa irashijeitari yamayetiri ishanincapee intaarantayeteneriri Tasorentsi impincatsatanteariri; tempa irotaque icantitacariri.

Iipatsite ishanincasanoripeeni Rubén

¹⁵ Jero ipanaqueriri Moiseshini quipatsi ishanincasanoripeeni Rubén, imoncarataqueri icaratasanojeiti iriori. ¹⁶ Oponeanaca iipatsite nampitsiqui Aroer, otsapijaqui Arnón, jero nampitsi timatsiri nianqui oirincaiteacotapai aisati maaroni opampaiteti jenoqui toncaari Medebaquiniri. ¹⁷ Irosati ojatanaque nampitsiqui Hesbón jero nampitsipeequiniri timayetatsiri jenoqui toncaari opampaiteti: Dibón, Bamot-baal, Bet-baal-meón, ¹⁸ Jahas, Cademot, Mefáat, ¹⁹ Quiriataim, Sibmá, Séret-sáhar timatsiri toncaariqui oirincaiteapai. ²⁰ Bet-peor, Bet-jesimot jero oirincaiteapaaca toncaari Pisgá. ²¹ Irojeitaque timatsiri

opampaiteti jenoqui toncaari, aisati maaroni ipincatsariventiniri Sihón amorreo savicatsiniri Hesbón, itsoncajeitaquero Moiseshini yoajeitanaquero; aisati jivatacantayetatsiniri savicatsiri Madiánaqui amitacotiriniri: Eví, Réquem, Sur, Hur jeri Reba. ²²Aisati yoaquero Balaam itomini Beor iotashiyetachaniri aisati oshequi pashinipee. ²³Aitaque overaacari iipatsite iriori ishanincasanoripeeni Rubén imoncarataquero icaratasanojeiti ishanincapee oconoancaro maaroni nampitsipee jero tsipanampiyetarori, irosati aretantaca nijaqui Jordán.

Iipatsite ishanincasanoripeeni Gad

²⁴Jero iipatsite ishanincasanoripeeni iriori Gad, ipanaqueriri Moiseshini. Imoncarataquero icaratasanojeiti iriori. ²⁵Oponeanaca Jazer jero nampitsipeequiniri Galaad, onianquirequi iipatsite ishanincapeeni Amón, irosati nampitsiqui Aroer timatsiri omonteroqui Rabá. ²⁶Jero aisati quipatsiqui otiminta nampitsi Hesbón, Ramat-mispé jero Betonim aisati nianqui omontetacaro Mahanaim, irosati overapaaca oipatsite nampitsi Debir. ²⁷Aisati ipajeitaquero oirincaiteapai otiminta Bet-aram, Bet-nimrá, Socut jero Safón, apanivanitapaintsiri ipincatsariventiniri Sihón. Aitaque overaacari iipatsite intatiqueroqui nija Jordán isotoapinitinta catsirincaiteri, irosati oquirincatanaque incajarequi Quinéret. ²⁸Irotaque maaroni nampitsipee ipajeitaqueriri Moiseshini ishanincasanoripeeni Gad, imoncarajeitaquero icaratasanojeiti iriori.

Iipatsite ishanincasanoripeeni Manasés

²⁹Aisati ipanaquero Moiseshini iipatsite cashetatatsiri ishanincasanoripee Manasés, imoncarataquero icaratasanojeiti iriori. ³⁰Yaajeitaquero yashiveitaniri Og pincatsariventironiri Basán, oponeanaca iipatsite iriori Mahanaim ocarajeiti 60 nampitsipee irashipeeni Jaír, ³¹Ora nianquiniri Galaad aisati nampitsipee Astarot jero Edrei. Maaroni ocapee irotaque irashi cashetani ishanincajeitaniri iriori Maquir itomini Manasés; imoncarataquero icaratasanojeiti iriori.

³²Irotaque oca quipatsipee ipayetanaqueriri Moiseshini irosati isavicajeitantapaacari opampaiteapai moabaquiniri, intatiqueroqui nija Jordán isotoapinitinta catsirincaiteri, omonteroqui Jericó. ³³Irintiquea ishanincasanoripeeni Leví, te imperiji quipatsi irashiteari, irointi icantaquero: “Yora Atasorensite aquemisantajeitiri iriotaque pajeitempineri coiteimojeitempineri.”

Ipayetaquero Josué ishanincapee iipatsite canaaquiniri

14 ¹Irotaque oca quipatsi Canaán yaajeitaquero ishanincajeitaniri Israel irisavicajeitanteari. Yora Eleazar, antaveetiniriri Tasorensi, itsipatari Josué jeri jivatacaajeitiriri ishanincasanoripee, ipayetavaquero

aparopeeni. ²Ipishonquimentaquero paitarica iotacantacariri Tasorentsi, ipajeitancariri caratatsiri 9 ishanincasanoripee jeri icashetatatsiri ishanincasanoripeeni Manasés. Imoncarataquero icantaqueriri Tasorentsi Moieshini. ³Yora ishanincasanoripeeni Rubén, Gad, jeri pashinipeeni ishanincasanori Manasés timanaque iipatsite intatiqueroqui nija Jordán, ipanaqueriri Moieshini. Irintiquea ishanincasanoripeeni Leví, te imperiji quipatsi irashiteari. ⁴Yora ishanincajeitaniri José icarajeitaque apite; inashijeitaca ishanincasanoripeeni Manasés jeri ishanincasanoripeeni Efraín. Irintiquea ishanincapeeni Leví tecatsi impe aparo quipatsi, irointiquea ipajeitaqueri nampitsipee irisavicajeitanteari aisati ipacoyetaqueri paashitomashi iriviratanteariri vacapee jeri ovishapee. ⁵Aitaque icantajeitaquerori quipatsi ipavacaajeitaro, imoncarataquero icantaqueriri Tasorentsi Moieshini.

Iipatsite Caleb ora Hebrón

⁶Yora ishanincajeitaniri Judá ijajeitaque anta nampitsiqui Guilgal inquenquetsatacayeri Josué. Yora Caleb, itomini Jefuné quenezeo, icantapaaqueri:

—Nopoqui nonquenqueshireacaajempro icantaqueriri Tasorentsi Moieshini, yora quemisantiriri, asavicaantajeitapaacari anta Cadés-barneaqui. Icantacotaquena narori aisati avirori. ⁷Ocaratantancari 40 nosarentsite, itiancantaqueeri Moieshini aponeanacaro Cadés-barneaqui amenanontantaitarori quipatsica Canaán. Apiajeitantanajarori, tempa acamantacotasantapaaquero cameetsa. ⁸Irintiquea acarajeivetaitari, yoimintsaroajeitapaaqueri ashanincapeeni. Aroquea ainti, acantani aquemisantaquero icantasanotaqueeri Atasorentsite yora aquemisantajeitiri. ⁹Ari icantasanotanaquena Moieshini iquemaquero Tasorentsi: ‘Ora quipatsi pamenanontaitiri, irotaque pisavicaanteari coajicani, aisati irotaque irisavicaantajeitajeari pishanincajeitajeari; tempa picantani piquemisantaquero icantasanotaquempiri Atasorentsite yora aquemisantajeitiri.’ ¹⁰Meece avisanaque 45 osarentsi icantasanotantacariri Tasorentsi Moieshini oca, ainiroquera atimayetapaaqueni caaraiteriqui. Imoncarataquero icantasanotaqueri, yoaneaquena. Meece nomoncarataquero 85 nosarentsite. ¹¹Irosati nocanta meece noneaperota, quempeni peerani itiancantaqueeri Moieshini amenanontantayetacaroniri quipatsica. Aitaque nomataquero nojayete nomanayetea noquempetani peerani. ¹²Irotaque nocantantimpiri meece: pimpenaro quipatsi toncaariquiniri icashiacaquenari Tasorentsi, isavicajeitinta ishanincajeitaniri Anac, antearitsantsayetatsiri. Aisati antearoitepee inampipee, oquisotasanoyeti itantocoyetirori. Iro cantaincha irio Tasorentsi matacayenarine nojocajeitanteariri: tempa irotaque icantasanotaqueri.

¹³Irosati icantacovenantacari Josué Tasorentsiqui intasoncovenanteariri. Ari ipaqueri nampitsi Hebrón irisavicajeitanti aisati irishanincajeitajeari coajicani. ¹⁴Aitaque ocontacari yaaquero Caleb quipatsi Hebrón. Irotaque meeca isavicajeitanti ishanincajeitaniri. Tempa iquearioventaquero iquemisantasantaquero Tasorentsi, yora Itasorentsite Israel. ¹⁵Ora Hebrón opajiveitani Quiriat-arbá. Iro opajitanti, itimi aparani shirampari pajitachani Arbá antearitsantsatsiri ishanincapeeni Anac. Impoi isavicajeitanaque cameetsa iipatsitequi, te irimanajeitajeari aisati.

Iipatsite ishanincasanoripee Judá

15 ¹Jero oca iipatsite yaajeitaquero ishanincasanoripeeni Judá, imoncarataquero icaratasanojeiti iriori. Oponeanaca otsapitapaa quipatsi Edom, irosati caariteriqui Sin quirincaniri. ²⁻³Ari oponeasanotanacari otsapijaqui incajare Catiojari, irosati jatanaintsi toncaariqui Acrabim, aisati avisanaquero caariteri Sin, irosati aretaincha Hesrón aisati Cadés-barnea quirincaniri. Impoi otoncaanaquero Adar, irosati shoncanaincha nampitsiqui Carcá. ⁴Aitaque oponeanajari avisanaquero Asmón, aretantacarori osanteniitetaqui Egipto, irosati incajarequi Mediterráneo. Aitaque overapaacari iipatsite quirincaniri. ⁵⁻⁶Iroquea isotoapinitinta catsirincaiteri irotaque ovecaratantapaacari incajare Catiojari irosati aatejatapaaquenta nija Jordán, aitaque oponeanajari ovecaratapaaca ocatoncotapaaque otoncaanaquero, Bet-hoglá avisanaquero Bet-arabá, irosati imperitayetaqui Bohán Ben-Rubén; ⁷Impoi otoncaanaquero oirincaiteacotapai Acor, irosati Debir. Irosati opiantanaca nampitsiqui Guilgal, omonteroqui toncaari Adumim otiminta osanteni quirincaniri, avisanaquero irosati En-semes osotoaajayetaqui nija, irosati jatanaintsi En-rogel. ⁸Irosati avisaintsi oirincaiteapai Ben-hinom, oirincaiteapaaca Jebús (pajitachari aisati Jerusalén), oquirincatapaaque. Impoi otoncaanaquero otishi timatsiri oirincaiteapai iqueapinitinta catsirincaiteri Hinom, aisati catonconiri oirincaiteapai Refaim. ⁹Ari oshoncanacaro otishi, irosati Neftóah osotoaajati nija. Impoi avisanaquero irosati nampitsipeequi timayetatsiri toncaariqui Efrón aisati Baalá (opajita aisati Quiriat-jearim). ¹⁰Aitaque overapaacari, impoi opianacaro antaqueronta iqueapinitinta catsirincaiteri irosati toncaariqui Seír, avisanaquero Quesalón onampinaqui toncaari Jearim catonconiri. Impoi oirincanaca irosati Bet-semes aisati avisanaquero Timná. ¹¹Aisati otoncaariyetaqui Ecrón catoncoquiniri, irosati oshoncantanacaro Socrón avisanaquero toncaari Baalá, irosati osotoantapaacaro Jabneel overapaaca incajare Mediterráneo. ¹²Aitaque overapaacari iqueanajinta

catsirincaiteri incajarequi Mediterráneo. Irotaque maaroni iipatsite iriori yaajeitaquero ishanincasanoripeeni Judá, ipavacaajeitacaro icaratasanojeiti iriori.

Imanatacoventaquero Caleb nampitsi Hebrón jero Debir.

(Jue. 1.10-15)

¹³Ari ipaquero Josué Caleb, itomini Jefuné, ishanincajeitaniri Judá, ora quipatsi Quiriat-arbá (opajita aisati Hebrón). Irotaque antearoitetsiri nampitsi isavicajeitantaniri ishanincapeeni Anac antearitsantsatsiniri. Imoncarataquero icantaqueriri Tasorensi. ¹⁴Yora Caleb yojocajeitaquero ishanincapeeni Anac carajeitatsiniri mava, pajitachaniri Sesai, Ahimán jero Talmi. ¹⁵Impoiji ijajeitanaque aisati imanajeitaquero savicajeitatsiri nampitsiqui Debir, pajiveitachaniri peerani Quiriat-séfer. ¹⁶Ari icanti Caleb: “Jaanicarica jivataquerone irimanatero nampitsica iranaacojeitaqueririca, nompacayeri nishintio Acsa irijinanteari.” ¹⁷Irio jivataquerori imanataquero Otoniel, itineri itomi Quenaz. Ipiajeitantajarori, irosati ipacantacari irishinto. ¹⁸Ari irotaintsi irantanaquearori ivancoqui, icantiro: “Pincanteri piri impeeta arori quipatsi ampanquiveetanteari.” Irosati aniireantanaca aashinotequi, isampitavaquero Caleb irishinto:

—¿Paita picoiri?

¹⁹Ari acanaquero:

—Nocoi meeca pipaquenaro onta quipatsi caaraiteri néguebiquiniri. Nocoi aisati pimpacotenaro osotoajayetapai nija.

Irosati ipacotantacaro nijapee catonconiri jero quirincaniri.

Inampipee ishanincasanoripeeni Judá

²⁰Irotaque ora quipatsi yaajeitaquero ishanincasanoripeeni Judá, ipavacaacaro icaratasanojeiti iriori. ²¹Jero aisati nampitsipee yaacojeitaquero quirincaniri overapaaca quipatsi Edom:

Cabseel, Éder Jagur, ²²Quina, Dimoná, Adadá, ²³Quedes, Hasor, Itnán, ²⁴Zif, Télem, Bealot, ²⁵Hasor-hadatá, Queriot, Hesrón (opajita aisati Hasor), ²⁶Amam, Semá, Moladá, ²⁷Hasar-gadá, Hesmón, Bet-pélet, ²⁸Hasar-sual, Beerseba, jero tsipanampiyetarori, ²⁹Baalá, Iim, Ésem, ³⁰Eltolad, Qesil, Hormá, ³¹Siclag, Madmaná, Sansaná, ³²Lebaot, Silhim jero En-rimón. Ocarati 29 nampitsipee apatoanaca jero tsipanampiyetarori.

³³Jero pashini yaacojeitaquero opampaiteapaaqui:

Estaol, Sorá, Asná, ³⁴Zanóah, En-ganim, Tapúah, Enam, ³⁵Jarmut, Adulam, Socó, Azecá, ³⁶Saaraim, Aditaim, Guederá jero Guederotaim. Ocarati 14 nampitsipee apatoanaca jero tsipanampiyetarori.

³⁷Jero pashinipee nampitsi:

Senán, Hadasá, Migdal-gad, ³⁸Dileán, Mispá, Jocteel, ³⁹Laquis, Boscat, Eglón, ⁴⁰Cabón, Lahmam, Quitlís, ⁴¹Guederot, Bet-dagón, Naamá jero Maquedá. Ocarataque iroori 16 nampitsipee apatoanaca jero tsipanampiyetaroni.

⁴²Jero pashinipee nampitsi:

Libná, Éter, Asán, ⁴³Ifta, Asná, Nesib, ⁴⁴Queila, Aczib jero Maresá. Ocarataque iroori 9 nampitsipee jero tsipanampiyetaroni.

⁴⁵⁻⁴⁶Jero pashini nampitsi:

Ecrón, aisati iroori tsipanampiyetaroni irosati jatanaintsi incajarequi. Aisati maaroni quempejiyetaroni Asdod jero tsipanampiyetaroni.

⁴⁷Jero nampitsi Asdod aisati tsipanampiyetaroni. Jero aisati nampitsi Gaza aisati iroori tsipanampiyetaroni, irosati jatanaintsi osanteniitetapei Egipto. Aitaque overapaacari incajarequi Mediterráneo.

⁴⁸Jero pashinipee toncaaripeequiniri:

Samir, Jatir, Socó, ⁴⁹Daná, Quiriat-saná (opajita aisati Debir), ⁵⁰Anab, Estemoa, Anim, ⁵¹Gosen, Holón jero Guilo. Ocarati 11 nampitsipee jero tsipanampiyetaroni.

⁵²Jero pashinipee nampitsi:

Arab, Dumá, Esán, ⁵³Janum, Bet-tapúah, Afecá. ⁵⁴Humtá, Quiriat-arbá (opajita aisati Hebrón) jero Sior. Ocarati 9 nampitsipee jero tsipanampiyetaroni.

⁵⁵⁻⁵⁷Jero aisati pashinipee nampitsi:

Maón, Carmel, Zif, Jutá, Jezreel, Jocdeam, Zanóah, Caín, Guibeá jero Timná. Ocarataque 10 nampitsipee jero tsipanampiyetaroni.

⁵⁸⁻⁵⁹Jero pashinipee nampitsi:

Halhul, Bet-sur, Guedor, Maarat, Bet-anot jero Eltecón. Ocarati 6 nampitsipee jero tsipanampiyetaroni.

⁶⁰Jero pashinipee nampitsi:

Quiriat-baal (opajita aisati Quiriat-jearim) jero Rabá aisati tsipanampiyetaroni.

⁶¹⁻⁶²Jero pashinipee nampitsi caaraiteriquiniri:

Bet-arabá, Midín, Secaca, Nibsán, Nampitsi Tivitatsiri jero En-gadi. Ocarataque 6 nampitsipee jero tsipanampiyetaroni.

⁶³Yora ishanincajeitaniri Judá te irimateriji irojocajeiteri jebuseopee savicatsiri nampitsiqui Jerusalén, irosati icanta isaviquimojeitiri.

Iipatsite ishanincasanoripeeni Efraín jeri Manasés

16 ¹Jero iipatsite iriori ishanincajeitaniri José. Oponeanaca otsapijaqui Jordán isotoapinitinta catsirincaiteri, irosati toncaariqui osotoaajayetapai nija Jericóquiniri. Irosati ojatanaque caaraiteriqui, avisanaquero otoncaariyetapai Jericó irosati namitsiqui Betel. ²Aitaque oponeanajari nampitsiqui Betel (pajitachari aisati Luz),

avisanaquero iipatsite arqitapee irosati Atarot. ³Impoiiji ojatanaque iqueapinitinta catsirincaiteri iipatsite jafletitapee, irosati overantapaaca Bet-horón quirincaniri aisati Guézer, irosati osotoantapaaca incajarequi Mediterráneo. ⁴Irotaque yaajeitaquero ishanincasanoripeeni Manasés jeri Efraín, ishanincajitaniri José.

Iipatsitepee ishanincasanoripeeni Efraín

⁵Jero overaayetacari iipatsite iriori ishanincasanoripeeni Efraín oponeanaca isotoapinitinta catsirincaiteri: Atarot-adar irosati nampitsiqui catonconiri Bet-horón. ⁶Ojatanaque aisati irosati incajarequi Mediterráneo, irosati overantapaaca catonconiri Micmetat. Ari oponeanaja isotoapinitinta catsirincaiteri irosati Taanat-siló, avisanaquero Janóah. ⁷Oirincanaca Atarot aisati Naará, irosati Jericóqui aisati osotoapaajiro nija Jordán. ⁸Ari oponeanaja aisati Tapúah, oijatanaquero iqueanajinta catsirincaiteri osanteni Caná, irosati incajarequi Mediterráneo. Irotaque iipatsite yaajeitaquero iriori ishanincasanoripeeni Efraín, ipavacaajeitacari icaratasanojeiti iriori. ⁹Aisati yaacojeitaquero nampitsipee jero tsipanampiyetarori timatsiri iipatsitequi ishanincasanoripeeni Manasés. ¹⁰Iro cantaincha yora ishanincasanoripeeni Efraín te irojocajeiteriji canaaneopee savicajeitatsiri Guézer, ishinejeitaquero isaviquimojeitaquero. Irointiquea icoacotapinijeitiri quireequi ipapinijeitiri, irosati icanta meeca isaviquimojeitiri.

Iipatsite ishanincasanoripeeni Manasés

17 ¹Jero iipatsite yaajeitaquero ishanincasanoripeeni iriori Manasés itomini José, jivatatsiri itimi. Yora Maquir manatincari ini, iriotaque itomini Manasés jivatatsiri itimi, iriotaque iriri Galaad; yaajeitaquero iriori quipatsi Galaad jero Basán intatiqueroniri nija Jordán isotoapinitinta catsirincaiteri. ²Aisati ipishonquimentaquero quipatsipee irayeteri pashinipee itomipeeni Manasés: Yora Abiézer, Hélec, Asriel, Siquem, Héfer jeri Semidá. Imoncarataquero icarajeiti. Iriojeitaque itomipeeni Manasés aisati icharinepeeni José.

³Yora Selofhad itomini Héfer icharineni Galaad itomini Maquir icharineni Manasés, te intimeji itomi irointi irishintopee ocarajeiti 5: Mahlá, Noá, Hoglá, Milcá jero Tirsá. ⁴Ari ojatashjeitaquero antaveetatsiri Eleazar, Josué jeri jivatacantajeitatsiri; ocantapaaquero: “Nocoli pimpena narori quipatsi piquempejeitaquero pashinipee noshaninca. Tempa icantasanotaquero Tasorentsi Moieshini, pimpantenari narori quipatsi.” Irosati ipantacaro, iquempejeitaquero pashinipee oshaninca. Imoncarataquero icantaqueriri Tasorentsi.

⁵Irotaque ipajeitantacariri ishanincasanoripeeni Manasés iipatsite caratatsiri 10 aisati quipatsi Galaad jero Basán, timatsiri intatiqueroqui

nija Jordán isotoapinitinta catsirincateri. ⁶Ari ipajeitaquero irishintopee iquempetaqueri shiramparipee, ora quipatsi Galaad irotaque irashi pashinipee oshanincajeitaniri.

⁷Ari oponeanaca iipatsite overapaaca irashi ishanincasanoripeeni iriori Aser irosati nampitsiqui Micmetat, montetarori Siquem, irosati jatanaintsi quirincaniri Tapúaqui, ocontejatapai nija. ⁸Ora nampitsi Tapúah irotaque quipatsi irashi ishanincasanoripeeni Manasés, irosati nampitsiqui Tapúah. Aitaque isavicajeitiri ishanincasanoripeeni Efraín. ⁹Impoiji ojatanaque quirinca irosati osantenitapai Caná. Omontetavacaaca inampipee ishanincasanoripeeni Efraín aisati Manasés, ora osanteni catonconiri overapaaca irotaque irashi ishanincasanoripeeni Manasés, irosati sotoapaintsi incajarequi. ¹⁰Yora ishanincasanoripeeni Efraín overapaaca iipatsite quirincaniri osanteniqui, aisati omontetacaró iipatsite ishanincasanoripeeni Manasés, irosati jatanaintsi incajarequi Mediterráneo. Aitaque overaanacari. Ari oijatanaquero irosati overantapaaca catonco iipatsitequi iriori ishanincasanoripeeni Aser, irosati overantapaaca iipatsitequi iriori ishanincasanoripeeni Isacar isotoapinitinta catsirincateri. ¹¹Aisati yaacojeitaquero nampitsipee, timayetatsiri iipatsitequi ishanincasanoripeeni Isacar jeri Aser. Aisati yaacojeitaquero tsipanampiyetarori: Bet-seán, Ibleam, Dor, Endor, Taanac, Meguido jero mavatatsiri otishijaniqui.

¹²Iro cantaincha te irimateroji irisavicantajeitearóji ocapee nampitsi; tempa yora canaaneopee ipiajeitacari irosati isavicajeitaque. ¹³Ari osamaniiteanaque ineaperotasanojeitanaca ishanincajeitaniri Israel, irosati icoacotapinijeitantacari impapiniteri quireequi. Iro cantaincha te ijocajeiteriji.

Yaacojeitaquero ishanincajeitaniri José inchatomashipee

¹⁴Yora ishanincajeitaniri José ijatashijeitaqueri Josué icantapaaqueri: —¿Paitampa pipantajeitaquenari capichaji quipatsi? Oshequi catsini nonajeitaque, tempa itasoncaventaquena Tasorentsi.

¹⁵Ari icantanaqueri Josué:

—Pishequitasanojeitaquerica catsini, teerica pimocarajeitearóji, ocameetsati pijajeite iipatsitequi ferezeopee jeri refaitapee, paajeitapeero inchatomashipee.

¹⁶Icantajeitanaqueri iriori:

—Queario, onta inchatomashipee eiro nomocarajeitarótsi. Aisati yora canaaneopee savicajeitatsiri opampaiteapai timatsi ishiacomentopee ashiroyetatsiri. Aisati iquempejeita savicajeitatsiri Bet-seán jero tsipanampiyetarori, aisati iriori savicajeitatsiri opampaiteapai Jezreel.

¹⁷Ari icantanaqueri Josué:

—Iro cantaincha oshequi catsini pinajeiti aisati pineaperotasanojeita.

¹⁸Ocameetsati paajeitero maaroni toncaaripee otiminta inchatomashipee

irosati overapaaca, eiro paarantitsi capichaji. Omaveteata ineaperotasanojeita savicajeitatsiri aisati otimayeveta ishiacomentopee ashioyotatsiri, aitaque pimataquero pintsoncajeiteri.

Iipatsitepee pashini ishanincasanoripeeni Israel

18 ¹⁻²Ari imataquero ishanincajeitaniri Israel imanatacoventajeitaquero quipatsi, iro cantaincha itimaarantaque 7 ishanincasanoripeeni caariquera timatsine iipatsite. Ari yapatojeitaca nampitsiqui Siló, irovetsicantearori Pancotsi irampatotimentanteariri Tasorentsi.

³Ari icantiri Josué: “¿Paitampa poyeajeitaquero caari pijajeitanta paajeitapeero quipatsi ipaquempiri Tasorentsisanori, yora ipincatsajeitaquero intacantajeitaqueerini? ⁴Pincoyee meeca ashanincasanoripee, incarayetaque mava aparopeeni acarajeitica, nontianquerita iramenayetaitero maaroni quipatsi. Impoiji incamantapeena amatantearori ampavacaayetearo. ⁵Yora amenanontajeiteroneri ocameetsati irimoncarayetaquero, onashiyetaquea oncarataque 7. Irojocanaquero iipatsite iriori ishanincajeitaniri Judá, ora quirincaniri aisati iipatsite iriori ishanincajeitaniri José ora catonconiri. ⁶Ariorica irimataquero irimoncarayetaitero oncarataque 7, impoijiquea incamantapaajena, irosati novishonquimentantaquearo Inantariqui Atasorentsite. ⁷Irintiquea ishanincajeitaniri Leví, eiro catsini otimi iipatsite, tempa iriojeitaque antaveeyetenerine Tasorentsi. Irintiquea ishanincasanoripeeni Gad jeri Rubén aisati cashetaarantatsiri ishanincapeeni Manasés timanaque iipatsite intatiqueroqui nija Jordán isotoapinitinta catsirincateri, ipanaqueriri Moiseshini, quemisantiriri Tasorentsi.”

⁸Ari yovetsacajeitanaca jatatsineri iramenanontero quipatsi. Irijatanteari, icantaquero Josué: “Pijajeite pimoncarayetaitero maaroni quipatsi. Pintsoncaquerorica, irosati pimpiajeitantajea aca nampitsiqui Siló, pincamantapeena, nomatantearori novishonquimentero aca Inantariqui Tasorentsi.”

⁹Irosati ijajeitantanaca itsoteaquero maaroni quipatsi, imoncarayetaquero ocarataque 7 inashitacaayetacaró. Aisati isanquenatacotaquero iroori nampitsipee. Impoiji ipiajeitajaro isavicajeitaquenta Josué. ¹⁰Irosati yovishonquimentantacaró Josué iotacantacariri Tasorentsi ipajeitantajariri ishanincasanoripee iipatsite.

Iipatsite ishanincasanoripeeni Benjamín

¹¹Ari imataquero yovishonquimentaquero quipatsi. Yora ishanincasanoripeeni Benjamín yaajeitaquero quipatsi iipatsitequiniri ishanincajeitaniri Judá aisati iipatsitequiniri iriori ishanincajeitaniri José.

¹²Oponeanaca iipatsite ocatoncotapaaque nija Jordán, irosati ojatanaque catonconiri Jericó. Impoijini ovaanaca toncaariqui iqueapinitinta catsirincaiteri irosati osotoantapaacaro caaraiteri Bet-avén. ¹³Irosati jatanaintsi nampitsiqui Luz (pajitachari aisati Betel) aisati oirincanaca quirinca Atarot-adar irosati toncaariqui timatsiri Bet-horón oquirincatapaaque.

¹⁴Impoiji opianacaro incajarequi Mediterráneo oquenampitanaquero toncaari quirincaniri montetarori Bet-horón, irosati Quiriat-baal, opajita aisati Quiriat-jearim, irotaque irashi iriori ishanincasanoripeeni Judá. Aitaque overaanacari iipatsite iqueapinitinta catsirincaiteri.

¹⁵Aisati iroori quirincaniri oponeanaca Quiriat-jearim, oijatanaquero iqueapinitinta catsirincaiteri irosati Neftóaqi, ocontejatapai nija. ¹⁶Impoiji oirincanaca irosati toncaariqui montetarori oirincateapai Benhinom aisati oirincateapai Refaim catonconiri. Irosati oirincantanaca oirincateapai Hinom, avisanaquero otoncaacoti Jebús oquirincatapaaque, aiquero ojatanaquero irosati En-rogel, ocontejatapai nija.

¹⁷Impoiji opianacaro catonco osoquijapaaquero En-semes, ovaanaca irosati Guelilot, montetarori otapiiteapai Adumim, ari oirincanaca irosati antearoitequi mapi Bohan Ben-Rubén. ¹⁸Aisati oquenampitanaquero catonco, otoncaaiteti montetarori oirincateacotapai nija Jordán, irosati oirincantanajaro otsapijaqui. ¹⁹Avisanaque ocatoncotapaaque Bet-hoglá, irosati opiajatapaaca incajare Catiojari ocatoncotapaaque, aatejatapaaque iroori nija Jordán. Aitaque overapaacari iipatsite quirincaniri.

²⁰Ora nija Jordán irotaque overantanacari isotoapinitinta catsirincaiteri. Irotaque ovecarantapaacari iipatsite iriori ishanincasanoripeeni Benjamín, ipayetaqueriri; imoncarataquero icaratasanojeiti iriori.

²¹Jero iroori nampitsipee yaacojeitaquero ishanincasanoripeeni Benjamín:

Jericó, Bet-hoglá, Émec-quesís, ²²Bet-arabá, Zemaraim, Betel, ²³Avim, Pará, Ofrá, ²⁴Quefar-haamoní, Ofní jero Gueba; ocarati 12 apatoanaca jero tsipanampiyetari.

²⁵Jero aisati Gabaón, Ramá, Beerot, ²⁶Mispá, Quefirá, Mosá, ²⁷Réquem, Irpeel, Taralá, ²⁸Selá, Élef, Jebús (opajita aisati Jerusalén), Guibeá jero Quiriat. Ocarati 14 nampitsipee jero tsipanampiyetari.

Irotaque iipatsitepee ishanincasanoripeeni Benjamín.

Iipatsite ishanincasanoripeeni Simeón

19 ¹Jero apitetapaintsiri quipatsi yojoquimentaquero Josué, yaajeitaquero iriori ishanincasanoripeeni Simeón. Ora quipatsi otimi iipatsitequi ishanincasanoripeeni iriori Judá. ²Aisati yaacotaquero nampitsipee: Beerseba, Sebá, Molada, ³Hasar-sual, Balá, Ésem, ⁴Eltolad, Betul, Hormá, ⁵Siclag, Bet-marcabot, Hasar-susá, ⁶Betlebaot, Saruhén.

Ocarati apatoanaca 13 nampitsipee jero tsipanampiyetarori. ⁷Aisati En-rimón, Éter jero Asán jero tsipanampiyetarori.

⁸Jero pashinipee tsipanampiyetarori irosati nampitsiqui Baalat-beer (opajita aisati Ramat) ora néguebiquiniri. Irotaque iipatsite iriori ishanincasanoripeeni Simeón. ⁹Ora iipatsite ishanincasanoripeeni Simeón irotaque impaarantayeetaqueriri ishanincasanoripeeni iriori Judá, tempa antearoite oni iipatsite yaajeitaqueri.

Iipatsite ishanincasanoripeeni Zabulón

¹⁰Jero mavatapaintsiri quipatsi yojoquimentaqueri Josué, yaajeitaqueri iriori ishanincasanoripeeni Zabulón. Oponeanaca Sarid, ¹¹ojatanaque iqueapinitinta catsirincaiteri irosati Maralá, impoiji ovaanaca Dabéset, irosati overantapaaca osanteniqui montetarori Jocneam. ¹²Oponeanaja aisati Sarid, ojatanaque isotoapinitinta catsirincaiteri irosati Quislot-tabor, avisanaque Daberat, otoncaanaque irosati Jafia. ¹³Aisati oijatanaquero isotoapinitinta catsirincaiteri Gat-héfer, avisanaque Itá-casín irosati areetantacaro Rimón, oshoncanacaro Neá. ¹⁴Impoiji catonco oshoncanacaro Hanatón, irosati osoquijantapaaca oirincaitecotapai Jéfté-el. ¹⁵Aisati otimaque 12 nampitsipee: Catat, Naalal, Simrón, Idalá jero Belén aisati tsipanampiyetarori. ¹⁶Irotaque oca iipatsite iriori ishanincasanoripeeni Zabulón aisati yaacojeitaquero nampitsipee jero tsipanampiyetarori.

Iipatsite ishanincasanoripeeni Isacar

¹⁷Jero caratapaintsiri 4 quipatsi yojoquimentaqueri Josué, yaajeitaqueri iriori ishanincasanoripeeni Isacar. ¹⁸Ora iipatsite oconoanacaro nampitsipee Jezreel, Quesulot, Sunem, ¹⁹Hafaraim, Sihón, Anaharat, ²⁰Rabit, Quisión, Ebes, ²¹Rémet, En-ganim, En-hadá, Bet-pasés, ²²irosati ojatanaque Tabor, Sahasimá jero Betsemes. Irosati overantapaaca nija Jordán. Apatoanaca 16 nampitsipee jero tsipanampiyetarori. ²³Irotaque iipatsite ishanincasanoripeeni Isacar aisati yaacojeitaquero nampitsipee jero tsipanampiyetarori.

Iipatsite ishanincasanoripeeni Aser

²⁴Jero caratapaintsiri 5 quipatsipee yojoquimentaqueri Josué, yaajeitaqueri iriori ishanincasanoripeeni Aser. ²⁵Ora quipatsi oconoanaca iroori nampitsipee Helcat, Halí, Beten Acsaf, ²⁶Alamélec, Amad jero Misal. Irosati ojatanaque iqueapinitinta catsirincaiteri, irosati areetantacaro toncaari Carmelo jero Sihor-libnat. ²⁷Jero overapaaca isotoapinitinta catsirincaiteri ojatanaquero catonco irosati Bet-dagón, overapaaca iipatsite iriori ishanincasanoripeeni Zabulón oirincaitecotapai Jéfté-el, Bet-émec, Neiel, irosati ojatanaque avisanaquero Cabul. ²⁸Irosati areetantaca Abdón, Rehob, Hamón, jero Caná. Irosati nampitsiqui Sidón antearoitetsiri. ²⁹⁻³⁰Impoiji

oshoncanacaro Ramá irosati nampitsiqui Tiro quisotacotasannotatsiri otanto. Impoiiji ovaanaca Hosá irosati osoquijantapaaca incajarequi Mediterráneo jero Mahaleb, Aczib, Umá, Afec aisati Rehob. Apatoanaca 22 nampitsipee jero tsipanampiyetarori. ³¹Irotaque iipatsite iriori ishanincasanoripeeni Aser.

Iipatsite ishanincasanoripeeni Neftalí

³²Jero caratapaintsiri 6 quipatsipee yovishonquimentaqueri Josué, yaajeitaqueri iriori ishanincasanoripeeni Neftalí. ³³Ora iipatsite oponeanaca nampitsipeequi Hélef, Elón-saananim, Adamí-néqueb, Jabneel, irosati Lacum areetacaro nija Jordán. ³⁴Jero overaanacanta ojatanaque iroori Aznot-tabor, iqueapinitinta catsirincaiteri, impoiiji Hucoc; omontetacaro iipatsite iriori ishanincasanoripeeni Zabulón quirincaniri. Impoiiji omontetacaro iipatsite ishanincasanoripeeni Aser iqueapinitinta catsirincaiteri. Iro omontetacaro iipatsite ishanincasanoripeeni Neftalí isotoapinitinta catsirincaiteri, irosati areetaincha nijaqui Jordán. ³⁵Jero nampitsipee tantotacotachari yaacotaqueri: Sidim, Ser, Hamat, Racat, Quinéret, ³⁶Adamá, Ramá, Hasor, ³⁷Quedes, Edrei, En-hasor, ³⁸Irón, Migdal-el, Horem, Bet-anat jero Bet-semes. Apatoanaca 19 nampitsipee jero tsipanampiyetarori. ³⁹Irotaque oca iipatsite iriori ishanincasanoripeeni Neftalí aisati yaacojeitaquero nampitsipee jero tsipanampiyetarori.

Iipatsite ishanincasanoripeeni Dan

⁴⁰Jero caratapaintsiri 7 quipatsipee yojoquimentaqueri Josué, yaajeitaqueri iriori ishanincasanoripeeni Dan. ⁴¹Otimi iroori nampitsipee Sora, Estaol, Ir-semes, ⁴²Saalabím, Aialón, Jetla, ⁴³Elón, Timnat, Ecrón, ⁴⁴Eltequé, Guibetón, Baalat, ⁴⁵Jehud, Bené-berac, Gat-rimón, ⁴⁶Mejarcón jero Racón, aisati quipatsiqui omonteroqui Joje. ⁴⁷Iro cantaincha te irimoncarajeitearoji oca quipatsi, irotaque ijataarantantacari nampitsiqui Lesem, imanajeitapaaqueri savicayetatsiri. Itsoncaqueri yoajeitapaaqueri. Irosati yantapaacaro iipatsiteni isavicajeitapaaque inampiniqui. Ipajitajiro iriori Dan, ipajitacotajiro ivajironi intacantacariniri iquenqueshireacojeitantariri. ⁴⁸Irotaque oca iipatsite iriori ishanincasanoripeeni Dan, yaacojeitaquero nampitsipee jero tsipanampiyetarori.

Iipatsite iriori Josué

⁴⁹Ari itsoncapaaca ishanincajeitaniri Israel ipajeitaqueri aparopeeni iipatsite, irosati ipantajeitacari iriori Josué quipatsi irisaviquimojeitantariri pashinipee ishaninca. ⁵⁰Imoncarataquero icantitacari Tasorensi, ipajeitaqueri nampitsi Timnat-sérah timatsiri

toncaariqui iipatsitequi ishanincasanoripeeni iriori Efraín; tempa irotaque icoanontacari. Ari yovetsicajiro Josué nampitsi, aitaque isavicajeitajiri.

⁵¹Ari itsoncaquero antaveetatsiri Eleazar jeri Josué aisati jivatacantajeitatsiri ipavacaajeitacaro maaroni quipatsi anta nampitsiqui Siló, otimaquenta Pancotsi yapatotimentantariri Tasorentsi. Aitaque ocantari imatasanotaquero ipaaraantajeitaqueri maaroni quipatsi ishanin capee.

Nampitsipee iraventeari oavacaashitachari

(*Núm. 35.6-34; aisati Deut. 4.41-43; jero 19.1-13*)

20 ¹Ari iquenquetsatacaajiri Tasorentsi Josué, icantiri: ²“Pincanteri pishanincapee incoyeeta nampitsipee iraventeari oavacaashitachari, nocantaqueriri Moiseshini. ³Intimerica aparoni iroashitaqueari ishaninca, teerica intsataashiteari iroyeri, ocameetsati irishianaque nampitsipeequi iraventapemparo, eiroquea yoantaritsi ishaninca camaintsiri, impiatacoventantajeariri.

⁴“Ariorica irareetapaaquearo nampitsi ashitacoroqui, ocameetsati incamantasanotapeeri jivatacantajeitatsiri paita ishiantanacari. Impoijiquea irishineteri inqueanaque aisati impavaqueri irisavicantapempari. ⁵Ariorica irojvetanaqueari ishaninca camaintsiri, yora jivatacantajeitatsiri nampitsiqui eiro ishincoventiritsi iroyeri. Tempa te intsataashiteariji iroyeri, te iro inquisanenterini. ⁶Yora shianainchari ocameetsati irisavique nampitsiqui irosati incantacoventantajeari maaroni savicajeitatsi nampitsiqui. Incanteani irisavique irosati incamantaqueari iriori jivatacairiri antaveeyetatsiri. Impoijiquea impianaje inampiqui iponeanaca peerani ishiantacari.”

⁷Irosati icoyeantaca ishanincajeitaniri Israel nampitsipee iraventapiniyeeteari: Ora Quedes Galileaquiniri, timatsiri toncaaripeequi iipatsitequi ishanincasanoripeeni Neftalí; jero Siquem, timatsiri toncaaripeequi iipatsitequi ishanincasanoripeeni Efraín; jero Quiriatarbá (opajita aisati Hebrón), timatsiri toncaaripeequi iipatsitequi ishanincasanoripeeni Judá. ⁸Jero aisati intatiquero nija Jordán, opampaiteapai jenoqui toncaari caaraiteriquiniri, isotoapinitinta catsirincaiteri otiminta Jericó. Icoyeaquero nampitsi Béser iipatsitequi ishanincasanoripeeni Rubén; anta quipatsiqui Galaad icoyeaquero Ramot timatsiri iipatsitequi ishanincasanoripeeni Gad; aisati quipatsiqui Basán icoyeaquero nampitsi Golán iipatsitequi ishanincasanoripeeni Manasés. ⁹Irotaque oca nampitsipee icoyeajeitaqueri iraventajeiteari ishanincajeitaniri Israel aisati pashinisati saviquimojeitiriri, ariorica iroaqueri itsipa, teerica intsataashiteariji iroyeri. Eiroquea imatantaritsi iroyeri ishaninca camaintsiri arirorica incoavetea impiacoventajearime, tequeratsitarica incantacoventeriji.

Inampipee iriori ishanincajeitaniri Leví
(1 Crón. 6.54-81)

21 ¹⁻²Yora jivatacaajeitiriri ishanincajeitaniri Leví ijataque anta nampitsiqui Siló, timatsiri iipatsirequi canaaneopee, inquenquetsatanteariri antaveetatsiri Eleazar jeri Josué aisati jivatacantajeitatsiri ishanincasanoripeeni Israel, icantapaaqueri: “Nopoqui noncantajeitempi: peerani icantasanotaqueri Tasorentsi Moieshini pimpajeitantenari nampitsipee nosavicajeitanteari. Aisati pimpacotenaro paashitomashi iroajeiteari novirapee.”

³Irosati ipajeitancari ishanincajeitaniri Israel ishanincapeeni iriori Leví nampitsipee jero paashitomashi iipatsitepeequiniri. Imoncarataquero icantaqueriri Tasorentsi.

⁴Ari ijivataque yojoquimentaquero nampitsipee yaajeitaqueri ishanincapeeni Quehat, iriotaque ishanincajeitaniri Aarón antaveeyetatsiri. Yaajeitaquero 13 nampitsipee iipatsitequiniri ishanincasanoripeeni Judá, Simeón jeri Benjamín. ⁵Aisati pashinipee ishanincasanoripeeni Quehat, yaajeitaquero 10 nampitsipee iipatsitequiniri ishanincasanoripeeni iriori Efraín aisati Dan jeri ishanincasanoripeeni Manasés savicajeitaintsiri acaqueroca nija Jordán iqueapinitinta catsirincaiteri.

⁶Impoiiji ishanincasanoripeeni iriori Guersón, yaajeitaquero 13 nampitsipee iipatsitequiniri ishanincasanoripeeni Isacar, Aser, Neftalí, jeri pashini ishanincasanoripeeni Manasés savicantajeitapaacarori quipatsi Basán.

⁷Jeri ishanincasanoripeeni iriori Merari, yaajeitaquero 12 nampitsipee iipatsitequiniri ishanincasanoripeeni Rubén, Gad jeri Zabulón.

⁸Yora ishanincajeitaniri Israel ipajeitaqueri ishanincapeeni Leví nampitsipee yojoquimentaqueri, aisati ipacoyetaqueri paashitomashi. Imoncarataquero icantaqueriri Tasorentsi Moieshini.

⁹Ora nampitsipee iipatsitequiniri ishanincasanoripeeni Judá jeri Simeón isanquenatacoteri, ¹⁰irotaque ipayetaqueriri ishanincasanoripeeni iriori Quehat yora ishanincajeitaniri Aarón, tempa iriojeitaque jivataintsiri yaaquero nampitsi. ¹¹Ora quipatsi toncaaripeequiniri Quiriat-arbá (pajitachari aisati Hebrón). Irotaque intarori inampini ishanincapeeni Anac antearitsantsatatsiniri aisati yaacotaquero paashitomashi. ¹²Irointiquea quipatsi timayetatsiri nampitsiqui aisati tsipanampiyetarori, irotaque irashi Caleb itomini Jefuné.

¹³Ora nampitsi Hebrón, irotaque aisati iraventeari jaanicaica oavacaachane, irotaque ipajeitaqueriri ishanincapeeni antaveetatsiri Aarón. Jero oca pashini nampitsipee: Libná, ¹⁴Jatir, Estemoa, ¹⁵Holón, Debir, ¹⁶Ain, Jutá jero Bet-semes. Ocarati 9 nampitsipee

aisati ipacoyetaqueri paashitomashi. ¹⁷Aisati iriori iipatsite ishanincasanoripeeni Benjamín ipajeitaqueri: Gabaón, Gueba, ¹⁸Anatot jero Almón, ocarati 4 nampitsipee, ipacoyetaqueri paashitomashi. ¹⁹Ari ocarati apatoanaca 13 nampitsipee yaaqueri antaveeyetatsiri ishanincapeeni Aarón. Yaacojeitaquero aparopeeni paashitomashi.

²⁰Jeri pashini ishanincajeitaniri Quehat, ipayeetaqueri nampitsipee iipatsitequiniri iriori ishanincasanoripeeni Efraín. ²¹Onta toncaaripeequiniri iipatsitequiniri ishanincapeeni Efraín, ipayeetaqueri nampitsi Siquem, irotaque iraventeari jaanica oavacaachane aisati Guézer, ²²Quibsaim jero Bet-horón, ocarati 4 nampitsipee ipacoyetaqueri paashitomashi. ²³Irioquea ishanincasanoripeeni Dan, ipayeetaqueri Eltequé, Guibetón, ²⁴Aialón jero Gat-rimón. Ocarati 4 nampitsipee ipacoyetaqueri paashitomashi. ²⁵Aisati iriori ishanincasanoripeeni Manasés, ipayeetaqueri acaquero caniri iqueapinitinta catsirincaiteri, apite nampitsi: Taanac jero Gat-rimón, ipacoyeetaqueri aisati paashitomashi. ²⁶Ocarati 10 apatoanaca inampipee ishanincapeeni Quehat, yaacojeitaquero paashitomashi.

²⁷Yora ishanincajeitaniri Leví, ishanincasanoripeeni Guersón, ipeetaqueri apite nampitsi, yashitari ishanincasanoripeeni Manasés: Golán, quipatsiquiniri Basán irotaque aisati iraventeari oavacaachane, jero Beestera; ipacoyeetaqueri pashitomashi. ²⁸Jeri ishanincasanoripeeni Isacar ipayeetaqueri iriori nampitsipee: Quisón, Daberat, ²⁹Jarmot jero Enganim. Ocarati 4 nampitsipee ipacoyetaqueri paashitomashi. ³⁰Jeri ishanincasanoripeeni Aser, ipayeetaqueri iriori nampitsipee Misael, Abdón, ³¹Helcat jero Rehob. Ocarati 4 nampitsipee ipacoyetaqueri aisati paashitomashi. ³²Aisati ishanincasanoripeeni Neftalí ipaqueri iriori mava nampitsipee aisati ipacoyeetaqueri paashitomashi: jero nampitsi Quedes Galileaquiniri, irotaque iraventeari oavacaachaneri; aisati Hamot-dor jero Cartán. ³³Ari ocarataque 13 apatoanaca inampipee ishanincapeeni iriori Guersón, yaacojeitaquero aparopeeni paashitomashi.

³⁴⁻³⁵Aisati iriori ishanincajeitaniri Merari caariquera timatsiri inampipee. Ipaqueri iipatsitequi ishanincajeitaniri Zabulón ora nampitsipee: Jocneam, Carta, Dimná jero Naalal. Ocarati 4 nampitsi ipacoyeetaqueri paashitomashipee ³⁶⁻³⁷Jeri ishanincasanoripeeni Rubén ipacoyeetaqueri nampitsi Béser, Jahas, Cademot jero Mefáat. Ocarati 4 nampitsi, ipacoyeetaqueri aisati paashitomashipee. ³⁸⁻³⁹Aisati ishanincasanoripeeni Gad ipaqueri iriori: Ramot timatsiri Galaad irotaque aisati iraventeari oavacaachaneri, jero nampitsipee Mahanaim, Hesbón aisati Jazer. Ocarati 4 ipacoyetaqueri paashitomashipee. ⁴⁰Ocarataque 12 nampitsipee yaajeitaqueri iriori ishanincapeeni Merari.

⁴¹⁻⁴²Ari ocarati apatoanaca 48 nampitsipee yaajeitaqueri ishanincapeeni Leví iipatsitepeequiniri ishanincapee. Yaacoyetaquero paashitomashipee timayetatsiri otsapiiqui aparopeequi nampitsi.

Imoncaratasanotiro Tasorentsi icantasanotiri

⁴³Aitaque ocantacari ipaqueri Tasorentsi maaroni quipatsi ishanincajeitaniri Israel. Icashiacaqueriri ora icantasanotaqueriri intacantajeitacariniri. Ari yashitasanojeitacaro quipatsi isavicajeitantacaro. ⁴⁴Yora Tasorentsi imoncarataquero icashiacaqueriri, isavicacaajeitaqueri cameetsa maaroni iipatsitequi. Te irimajeiteriji quisajeitiriri irimanajeiteri; tempa imatacaasanotaqueri Tasorentsi yanaacojeitantacariniri. ⁴⁵Tecatsi aparo impeacotimataquea Tasorentsi, imoncarataquero maaroni cameetsayetatsiri icashiacaqueriri ishanincajeitaniri Israel.

Ipiajeitantanajari ishanincajeitaniri Rubén, Gad jeri Manasés savicaarantapaaintsiri intatiquero

22 ¹Impoiiji yapatojeitaqueri Josué ishanincasanoripeeni Rubén, Gad jeri cashetatatsiri ishanincapeeni Manasés. ²Icantajeitiri:

“Meecca pimoncarajeitaquero icantasanotaquempiri Moiseshini, quemisantiriri Tasorentsi; aisati piquemisantajeitaquero maaroni nocantajeitaquempiri narori. ³Picantani acaratavacaajeitaca, irosati meeca. Te ajocavacaajeiteaji. Piquearioventajeitaquero pimoncarataquero icoacaquempiri Atasorentsite. ⁴Meecca timanaque iipatsitepee maaroni ashaninca. Imoncarataquero Avincatsarite Tasorentsi icashiacaqueeri, isavicaajeitanaque cameetsa. Meecaquea pimpiajeitanaje avirori piipatsitepeequi intatiqueroqui nija Jordán, ipajeitanaquempiri Moiseshini, quemisantiriri Atasorentsite. ⁵Irointiquea noncantasanojeitavaquempi: pimoncaratero icantacantiri Tasorentsi, icantaqueriri Moiseshini quemisantiriri. Ocameetsati pinintasanojeiteri, pincanteani pinquemisantanoteri, pimatasanotero icoacaajeitaqueeri. Aiquero pijatatiye pishiretasanoteari catsini.”

⁶Impoiiji icantacoventaqueri Tasorentsiqui intasoncacoventajeitanteeari aisati yovetsajeitavajari, irosati ipiajeitantanaja ivancojaniquipeequi.

⁷Yora Moiseshini ipanaqueri iipatsite cashetatatsiri ishanincasanoripeeni Manasés intatiqueroqui nija Jordán otiminta quipatsi Basán; irioquea Josué paqueriri itsipapee iipatsite acaqueroca nija Jordán iqueapinitinta catsirincaiteri isaviquimojeitaqueri ishanincapee. Intajari icantacoventavajiri Tasorentsiqui jivajeitajantsineri irijataje, irosati itiancantajari ipiajeitanaja. ⁸Ijajeitantanajari icantavaqueri: “Ariorica pareejeitapaajea piipatsitepeequi, pimpaarantapeeri pishanincapee timimojeitaquempiri: pivirapee, oro, plata, bronce, ashroyetatsiri jero quitsaarentsipee, paitajeitaqueriri quisajeiteeri.”

⁹Aitaque ocantacari ijajeitanaji ishanincasanoripeeni Rubén, Gad jeri cashetatatsiri ishanincapeeni Manasés, yojocajeitanajiri ishanincapee

savicajeitapaintsiri Silóqui quipatsiquiniri Canaán. Ipiajeitanajaro iipatsitequi iriori timatsiri Galaad, ipanaqueriri Moiseshini, imoncarataquero icantaqueriri Tasorentsi.

Ipiotapaaquero mapi otsapijaqui Jordán

¹⁰Yarejeitantapaajarori nijaqui Jordán ishanincasanoripeeni Rubén, Gad jeri cashetatatsiri ishanincapeeni Manasés, yovetsicajeitapaaque antearo altar iipatsitequi canaaneopee. ¹¹Ari iquemacojeitaqueri itsipapee ishaninca oca yantaqueri, yovetsicapaaque ishanincasanoripeeni Rubén, Gad, jeri Manasés altar acaqueroca nija Jordán ovecaratapaaca quipatsi Canaán. ¹²Iquemacotantacariri ishanincapee, irosati yapatojeitantaca Silóqui irimanajeitavajerime.

¹³Ari itiancaqueri Finees, itomi Eleazar antaveetatsiri, irijatanteari anta Galaad isavicajeitapaaquenta ishanincasanoripee Rubén, Gad jeri cashetatatsiri ishanincasanoripeeni Manasés, inquenquetsatanteariri.

¹⁴Aisati icarajeitanaqueri 10 aparopee jivatacaayetiriri ishanincasanoripee iriori. ¹⁵Yarejeitantapaacari, icantapaaqueri:

¹⁶—Narojeitaque quenquetsacaajeitiriri ishanincatacari Tasorentsi. ¿Paita pantimojeitaqueriri Atasorentsite? ¿Paitaquea pojocajeitantanajariri Tasorentsi povetsicantacari altar pimpiatsatanteariri? ¹⁷¡Tempa pinquenqueshirejeitero ji caari cameetsatatsi antajeitaqueri toncaariqui Peor! Irosatiquera meeca acantajeita te ancameetsajeiteji. Tempa irotaque itsoncaarantantacari, icamajeitaque ishanincavetacari Tasorentsi. ¹⁸¡Tempa aashireimatempiji meeca aiqero picoajeitanaitii pojocanajeri Tasorentsi! Pipiatsatacaririca meeca, osaitequera iroasanquetaajeitee maaroni. ¹⁹Aisati, teerica oncameetsatimojeitempi oca quipatsi paajeitaqueri, tsamete ajajeitaje otimaquenta Inantari Tasorentsi, ancaratavacaajeitapaajea. Paajeitapee quipatsi nosavicajeitaquenta. Iro cantaincha eiro piatsataritsi Tasorentsi. Eiro povetsicashitatsi pashini altar, tempa ainiro altar irashi Atasorentsite. ²⁰Pinquenqueshiretero yantaqueri peerani Acán itomini Zérah, yaarantavaque icashiavetacari Tasorentsi antsoncasanojeiterome. Irotaque iquisajeitantacariri ashanincapeeni. Te apaniro iriori incamimentero caari cameetsatatsi yantaqueri.

²¹Ari yacajeitanaqueri ishanincasanoripeeni Rubén, Gad jeri Manasés yora jivatacaajeitantatsiri. Icantiri:

²²—Yora Tasorentsisanori, anaacotirori maaroni ijitasorentsitashiyeetari, iotaquero te iro novetsicantearo altar nompiatsateari aisati nojocantanajeariri. Iotasanotiro iriotaque iotacaajeitempineri avirori. Iroorica novetsicantacaro eiro noquemisantantajaritsi, ocameetsati poajeitena. ²³Aisati iroorica nontaanteanariri virantsipee, panquirentsipee aisati

iraacameetsajeitantanari, irio cantimentajeitenarone nantajeitaqueri. ²⁴Queario iro novetsicantacarori, te noncoyeji incantavacaajeitea atomipee coajicani. ‘¿Paita pinquemisantantariri Tasorentsi iquemisantajeitiniri intacantajeitaqueerini?’ ²⁵Yora Tasorentsi yoaquero nija Jordán nashitacaajeitaqueeri meeca, avirojei ishanincasanoripeeni Rubén jeri Gad, tecatsi oncantea pinquemisanteri Notasorentsite.’ Aitaque incanteari pitomipee irojocacaajeiteri notomipee narori, eiro iquemisantantajeitajaritsi Atasorentsite.

²⁶“Irotaque noquenqueshireajeitacari novetsicantacarori altar, te iro nontaanteanariri Tasorentsi virantsi aisati paitapeerica. ²⁷Irointiquea iotacaajeiteeneri aisati iotacaajeiterineri ashanincajeitajeari coajicani, acaratavacajaitea aquemisantiri Tasorentsi. Aisati ocameetsati amapiniteneri virantsipee antaimeterori caari cameetsatsi antayetiri, iraacameetsajeitanteeri. Eiroquea icantantaritsi pishanincajeitajeari avirori yora noshanincajeitajeari narori coajicani: ‘Te noncoyeji noncarajeitempi anquemisanteri Tasorentsi.’ ²⁸Noquenqueshirejeitaca timatsirica sampitenane iriorica isampiyetee noshanincapee nancantanaqueeriri: ‘¡Pamenero, yora intacantajeitaquenariri yovetsicanaqueneri Tasorentsi oca altar! Te iro nontaanteanariri virantsipee aisati te iro noayetanteariri. Irointiquea quenqueshiretacaajeiteeneri aquemisantiri Tasorentsi.’ ²⁹Irio Tasorentsi oipacaacoventajeitajenane nopiatsajeitacaririca, nojocajeitaqueririca, novetsicashitantacari pashini altar nontaanteneeriri virantsipee, panquirentsipee jero pashinipee. Tempa niojeitaque timatsi aparoni altar anta Inantari Tasorentsi.”

³⁰Iquemantavacarori Finees aisati icarajeitaqueri icantaqueriri, onimojeitanaqueri. ³¹Ari icantanaque Finees itomi antaveetatsiri Eleazar: —Jaa, niotasanojeitaque meeca icarajeitaquee Tasorentsi, te pincoajeite pimpiatsateari. Meecaquea eiro yoasanquetaajeiteetsi.

³²Itsoncantanacarori iquenquetsatacairi, ari yovetsajeitanajari, irosati ipiajeitantanaja iponeanajaro Galaad irosati quipatsiqui Canaán. Yareejeitantapaajari, icamantapaaqueri maaroni ishanincapee icantavaqueriri. ³³Iquemajeitantavajariri, onimojeitanajiri aisati icantacojeitanaqueri Tasorentsi: Icameetsati. Irosati te inquenqueshiretajeiroji irimanajeiteri.

³⁴Yora ishanincajeitaniri Rubén aisati Gad ipajitaquero ipiotaqueri mapi. “Totacantatsiri” Icanti: “Oca altar, irotaque iotacaajeiteeneri yora Atasorentsite, iriotaque Tasorentsisanori aquemisantajeitiri.”

Iquenquetsatacairi Josué ishanincajeitaniri Israel

23 ¹Ari osamaniiteanaque itasoncaventaqueri Tasorentsi maaroni ishanincajeitaniri Israel, isavicajeitanaque cameetsa

te irimanajeitajeriji quisajeitiriri. Aisati anteashipatasanotapaaque Josué. ²Ari icajemacantaquero maaroni ishanincajeitaniri Israel, jivatacantajeitatsiri, cantacoventantatsiri, maaroni, icantiri:

“Meeca noshaninca, anteashipatasanotapaaquena, oshequitanaque nosarentsite. ³Tempa pineajeitaquero jaoca icantaqueriri Tasorentsi maaroni savicajeitatsiniri aca yora quisajeivetaqueeri jocaajeivetavaqueeri. Iriotaque amitacotaqueeri atsoncaarantajeitantacariri. ⁴Aisati novishonquimentaquero oca quipatsi nopajeitantaquempirori, amanatacoventajeitaquero pisavicajeitantacari. Aisati nopajeitaquempiro caariquera amanatacoventajeiti oponeanacaro nijaqui Jordán irosati acaqueroquininri incajarequi Mediterráneo, iqueapinitinta catsirincateri. ⁵Irio Tasorentsi matacaajeitempine pintsoncajeitantariri savicajeitatsiri, paajeitantarori iipatsitepee; tempa irotaque icashiacaajeitaquempi Avincatsarite Tasorentsi.

⁶“Pinquearioventasanoteroqueti meeca pimincaratero maaroni ocantiri isanquenatacaqueriri Tasorentsi Moisheshini. Pimincaratasanotero ocantayetiri. ⁷Eiroquea piconoajeitantaritsi savicajeitatsiri aca. Eiro pipincatsatashiyetarotsi ijitasorentsitashiyetari. Eiro piquemisantashiyetarotsi. Eiro catsini piquenquetsatacotimatirotsi aisati eiro picantacotimatirotsi pimincaratanantarori pincanteri. ⁸Apaniro pinquemisantasanojeiteri Avincatsarite Tasorentsi, pincanteani, aquempejeitaca meeca. ⁹Tempa iriotaque matacaajeitaqueeri amajeitantariri anaacojeitaquero savicajeitatsiniri nampitsipeequi neaperotasanoyetachaniri. Tecatsi anaacojeiteene, irosati meeca. ¹⁰Pincaravetearica aparoni, ario poimishiaquero carajeivetachaneri 1,000 manavetempineri; tempa iriotaque Atasorentsite manacoventajeiteeri. Tempa aitaque icantasanotitaca. ¹¹Queariompiyea, paamaventacojeitea avisati, pinintasanoteri Avincatsarite Tasorentsi. ¹²⁻¹³Nocoaque piojeitero oca: ariorica pojocanajeri Tasorentsi, pinconoajeitaquearirica saviquimojeitaqueeri aca, paajeitaquerorica irishintopee, eiro yamitacojeitajimpitsi Tasorentsi pintsoncajeitantariri. Irotaque irishinetacoventajeitantempiri iroashinoncaajeitempi, oshequi catsini ompomerentsitimojeitempi. Onquempetaquea impasayeetempirica pitapiiqui aisati osataajatemperica quitotseequi poquiqui. Irosati pintsoncajeitanteari, tecatsi savicajeitanajantsine aipatsitequica cameetsatasanotatsiri ipavetaqueeri Avincatsarite Tasorentsi.

¹⁴“Meeca narori irotaintsi noncame. Irotaque nocoacaasanotantaquempi pinquenqueshiretasanotero, imoncaratasanotaquero Tasorentsi maaroni cameetsayetatsiri icantasanotaqueeri. Tecatsi catsini impeacotimataquea icashiacaajeitaqueeri. ¹⁵Pineajeitaquero imatasanotaquero Tasorentsi, imoncarataquero maaroni cameetsayetatsiri icashiacaajeitaquempi.

¹⁶ Aisati onquempetaquea, eirorica pimoncaratirotsi icantasanovetaquempiri, pimpincatsatashiyetaquearorica ijitasorentsitashiyeetari, aitaque inquisajeitanaquempi, intiancajeitempiro oashinoncantsipee. Irosati pintsoncajeitanteari, tecatsi savicajeitanajantsine aipatsitequica cameetsatasanotatsiri ipajeitaqueeri.”

Yoverantanacarori Josué iquenquetsatacaanjiri ishanincapee

24 ¹ Ari yapatojeitaqueri Josué maaroni ishanincasanoripeeni Israel anta nampitsiqui Siquem. Icajemacantaqueri jivatacantajeitatsiri, irosati yapatotantacari itiminta Tasorentsi Inantariqui. ² Icantiri maaroni ishanincapee:

—Jeroa icantiri Avincatsarite, iriotaque Itasorentsite Israel: ‘Peerani yora Téráh jeri itomipee Abrahama aisati Nahor, iriotaque intacantajeitaquempiniri, isaviquimojeitironi otsapijaqui nija Éufrates. Ipincatsatashiyeveitaroni ijitasorentsitashiyetari. ³ Aitaque nocajemaqueri Abrahamani, namaqueri aca naniitacaqueri maaroni quipatsiqui Canaán. Noshequiacaasanojeitaqueri ishanincajeitaniri. Nopaqueri jivatatatsiri itomi ipajiaqueri Isaac. ⁴ Aisati nopaqueri Isaac apite itomi iriori: Jacob jeri Esaú. Yora Esaú nopaqueri quipatsi toncaariquiniri Seír. Irintiquea Jacob jeri itomipee ijajeitaque Egiptoqui.

⁵ ‘Impoiji notiancaqueri Moiseshini jeri Aaróni, aisati noamaajeitaqueri egiptosati, irosati naajeitantajimpi avirori. ⁶ Isoquijajeitantanjari intacantajeitaquempiniri Egiptoqui, yora egiptosati yoijanajeivetavajari ishiacomentapeequi aisati iyavaayotepeequi, irosati incajarequi Quitioncari. ⁷ Impoiji yaventajeitaquena, irosati noantacaro mencori tsitenishaasanotatsiri jocaajeitavaqueriri caari ineajeitantari. Aisati nopijatacaajaro incajare itsitajeitantanacari. Pineajeitaquero oca nantaqueri Egiptoqui.

“Impoiji pisavicajeitapaaque avirori oshequi osarentsipee caaraiteriqui, ⁸ irosati namajeitantajimpi iipatsitequi amorreopee iquenapiniti catsirincaiteri anta intatiqueroqui nija Jordán. Imanajeivetavaquempi, iro cantaincha nomatacaajeitaquempi pitsoncajeitantacariri, paajeitantacarori iipatsite. ⁹ Aisati iquempevetaca Balac, pincatsariventajeivetariniri ishanincapeeni Moab, itomini Sipor, ipocajeivetaca imanajeitempime. Yora Balac itiancaque amenerine Balaam itomini Beor, irimatsitacantajeitantempimeri. ¹⁰ Iro cantaincha te noshineteriji irimatsitacantajeitempi. Irointi icantacoventapinijeitaquempi cameetsa notasoncacoventajeitantaquempiri. Aitaque ocantacari novisaacojeitantaquempiri. ¹¹ Irosati pimonteajeitantacaro nija Jordán, irosati pareejeitantacaro nampitsi Jericó. Yora savicajeitatsiniri (amorreopee, ferezeopee, cananeopee, hititapee, gergeseopee, heveopee jeri jebuseopee) imanajeivetavaquempi iriori. Iro cantaincha

nomatacaajeitaquempi panaacojeitantacariri. ¹² Aisati iquempetaca yora apitetatsiniri pincatsariní amorreo, te aviro tsoncajeiterine pisataamentoqui aisati piveanequi. Narotaque tiancaqueneriri tsaroantsi itsaroacaasanojeitantavaquempiri. Irotaque ishiapitsajeitantanaquempiri tequeratsita pareejeitearíji pimanajeitanteariri. ¹³ Nopajeitaquempiro quipatsi caari pantavejeiti, aisati nampitsipee caari povetsiqui. Meeca pisavicajeitantacaro aisati poajeitacaro ovapee jero oitsoqui orivo caari pipanquijeiti.”

Ari yovaajiniri Josué aisati:

¹⁴—Irotaque ocameetsatantari pimpincatsatasanoteri Tasorentsi aisati pantaveetasanoteneri cameetsa aisati pinquearioventero. Pojocajeitajeri ijitasorentsiyetiri yora ipincatsatashijeitaniri intacantajeitaquempiniri anta otsapijaqui nija Éufrates aisati anta Egiptoqui. Ironti pantaveetasanoteneri Tasorentsi. ¹⁵ Iro cantaincha terica pincoyeji pantaveeteneri Tasorentsi, aviro cantajeitatsine meeca jaanicarica pantaveeteneri: iriorica ijitasorentsitashiyeetari yora yantaveejeitinirini intacantajeitaquempiniri anta otsapijaqui Éufrates, irompa iriorica ijitasorentsiyetiri amorropee savicantajeitarori oca quipatsi. Naroquea nainti aisati noshanincasanorípee, nantaveetasanojeiteneri Tasorentsi.

¹⁶ Ari icantajeitanaqueri maaroni ishanincapee:

—¡Eiro catsini ishinetanatsi Tasorentsi nojocajeiteri nantaveetanteariri pashini ijitasorentsitashiyeetari! ¹⁷ Tempa iriotaque Tasorentsi oimishitoajeitajeeeri aisati ashanincapeeni asavicantajeiveitaniri Egiptoqui yomperanajeitantavetaqueeri. Yonijaaqueero oshequi catsini caari aneapinijeiti. Iriotaque jocaacoventaqueeri aisati iticaacoventaquee apocajeitantacari, avisantayetanacarori nampitsipee. ¹⁸ Iriotaque joquimojeitaqueeriri maaroni nampitsipeequiniri aquenajeitapaaquenta, aisati amorropee savicajeitatsiniri aca. Irotaque ocameetsatantari nantaveejeiteneri narori. Tempa iriotaque Atasorentsite.

¹⁹ Ari icantanajiri iriori Josué:

—Eiro pimajeitirotsi pinquemisantasanoteri, tempa iriotaque Tasorentsisanori icameetsatasanoti, itsaneacotimpiro. Pantajeiterorica caari cameetsatsi, eiro yamavetacotimpirotsi eiorica piquemisantiritsi.

²⁰ Icaavintsaasanojeivetaquempi cameetsa, iro cantaincha ariorica pojocajeitaquero piquemisantiri, pimpincatsatashiyetanaquearorica pashinípee ijitasorentsitashiyeetari, aitaque iroashinoncaajeitaquempi intsoncajeitempi maaroni. Patsipetarocari pineajeivetacaro oshequi cameetsatasanotatsiri.

²¹ Ari icantajeitanaji iriori:

—Eiro avishimotanatsi oca; aitaque nompincatsajeitaqueri Tasorentsi.

²² Ari icantanajiri Josué:

—Aviroyeata avirojeitaque cantajeitaintsi; picoajeitaque pantaveeteneri Tasorentsi.

Yacajeitanaque:

—Jee, narojeitaque.

²³Irosati icantantanacari Josué:

—Meeca pojocajeitajeri maaroni pijitasorentsishiyetari timimojeitimpiri. Pinquenqueshiretasanotajeri maaroni pishirequi Avincatsarite Itasorentsiste Israel.

²⁴Ari icantajeitanaji aisati:

—Queario, aitaque nonquemisantasanojeitaquero Atasorentsiste. Ari nomoncarajeitaquero paitarica incoacayenari.

²⁵⁻²⁶Ari icantavacaasanojeitaca Josué jeri ishanincapee anta nampisiqui Siquemi.

Yoametaquero icantacantayetiri Tasorentsi. Isanquenatacotaquero otiminta Icantacantiri. Impoiji yaaque Josué antearo mapi, yoaquero otsitiqui inchato encina catiimotarori Inantari Tasorentsi. ²⁷Ari icantiri maaroni ishanincapee:

—Oca mapi irotaque quenqueshireacaajeiteene maaroni icantasanojeitaquero Tasorentsi. Irotaque cantacoventajeitempineri avirori, eiroquea pitseeacantaritsi Tasorentsi. ²⁸Irosati itiancantajeri Josué ishanincapee inampipeequi.

Icamantacari Josué

(Jue. 2.6-10)

²⁹Ari osamaniiteanaji capichaji, irosati icamantaca Josué itomini Nun, quemisantiriri Tasorentsi. Ocaratanaque 110 irosarentsiste. ³⁰Itijayeetaquero iipatsitequi iriori pajitachari Timnat-sérah, timatsiri toncaaripeequi iipatsitequi ishanincasanoripeeni Efraín, otiminta aisati toncaari Gaas ocatoncotapaaque. ³¹Yora ishanincajeitaniri Israel iquemisantasanojaquero Tasorentsi ainiroquera yaneini Josué aisati yaneajeitini iriori jivatacantayetatsiniri neasanoyetironiri maaroni imayetaquero Tasorentsi, yonijaajeitaqueriri.

Itijaquero itonquini José

³²Aisati itijaquero itonquini José Siquemiqui, yamajiri peerani Egiptoqui. Ora Siquem irotaque iipatsite Jacoboni yamanaqueriri itomipeeni Hamor iririni Siquem, ipinaventaquero 100 imentaqui quireequi. Irotaque yashijeitacari ishanincajeitaniri José.

Icamaque iriori Eleazar

³³Impoiji icamaque iriori Eleazar itomini Aarón. Itijaquero otishitapai iipatsitequi itomi pajitachari Finees, ipaqueriri ishanincapeeni Efraín toncaariquiniri.